

NÜXĪRAÜXÜ GA POPERA GA CORĪTIUCŪĀX GA YAXŌGÜXÜTANÜWA NAMUXÜ GA PAURU

Pauru rü nüxü narümoxē ga yema yaxōgüxü ga Corĭtiuarü ĩānewa yexmagüxü

¹⁻² Pa Chaueneēgü i Corĭtiucŭāxgüx, choma i Pauru nixĭ i Tupana yaxuxü norü ngüchaxümaā na Ngechuchu ya Cristu norü puracüwa choxü namuxücèx. Rü choma rü namaā i taeneē i Chótene nixĭ i pexü tarümōxēgüxü rü pexcèx tanaxümatüxü i ñāā popera. Pa Chaueneēgü ya Tupanaärü Ixīgüxex, pema rü marü Tupanapēxewa pixüüne yerü Ngechuchu ya Cristu marü pexü nixüünexēē. Rü Tupana rü marü pexü nade na norü duüxügü pixīgüxücèx wüxigu namaā i guxüma i ngēma duüxügü i guxüwama tórü Cori ya Ngechuchu ya Cristuxü icuèxüügüxü. Rü nüma ya Ngechuchu ya tórü Cori ixīcū, rü ngēma duüxügüarü Cori ta nixĭ. ³ Rü chanaxwèxe ya Tanatü ya Tupana rü tórü Cori ya Ngechuchu ya Cristu norü ngechaxügagu poraācū pexü narüngüxēē rü pexü nataāēxēē.

Tupana tüxü narüngüxēē erü Cristuarü duüxügü tixīgü

⁴ Rü taguma nüxü charüchau na Tupanana moxē pexcèx chaxāxü. Rü moxē nüxna chaxā naxcèx i ngema ngüxēē i Ngechuchu ya Cristugagu Tupana pexna āmarexü. ⁵ Yerü Cristugagu Tupana

pexna nanamu ga Naāxē i Ūūnexŭ na pemaxā inaxāūxŭcèx. Rŭ pexna nanaxā ga norŭ ore, rŭ naétŭ pexŭ nanatauxchaxēē na nŭxŭ pecuáxŭcèx na ñuxŭ ñaxŭchiga yixŭxŭ. ⁶ Rŭ yemaācŭ yexguma nŭxŭ pexŭñŭēgu ga yema ore ga Cristuchiga rŭ aixcŭma peyaxōgŭ. ⁷ Rŭ ngēmacèx i ñuxma na ípenanguxēēxŭ na wena táxarŭ núma naxŭxŭ ya tórŭ Cori ya Ngechuchu ya Cristu, rŭ Tupana pexna nanaxā i taxŭ i cuèx na taxuŭma pexŭ taxuxŭcèx na naxcèx pemaxēxŭ. ⁸ Rŭ ngēmaācŭ tá pexna nadau ya Tupana ñuxmatáta nagŭ i naāne, rŭ guxŭgutáma pexŭ naporaexēē na aixcŭma peyaxōgŭamaxŭcèx rŭ naxcèx pemaxēxŭcèx, na taxuema chixexŭmaā pexŭ ixugŭxŭcèx i ngēxguma wenaxārŭ núma naxŭxgu ya tórŭ Cori ya Ngechuchu ya Cristu. ⁹ Rŭ Tupana rŭ guxŭguma nayanguxēē i norŭ uneta. Rŭ núma nixŭ ga pexŭ nadexŭ na aixcŭma Nane ya tórŭ Cori ya Ngechuchu ya Cristumŭcŭgŭ pixŭgŭxŭcèx.

Nŭgŭ nitoye ga yema yaxōgŭxŭ

¹⁰ Pa Chaueneēgŭx, tórŭ Cori ya Ngechuchu ya Cristuégagu pexŭ chacèxŭ na wŭxigu pegŭmaā perŭxŭñŭēxŭ rŭ tama pegŭ pitoyexŭcèx. Rŭ name nixŭ i aixcŭma pegŭ pengechaŭgŭ rŭ aixcŭma wŭxigutama perŭxŭñŭē i peāēwa. ¹¹ Pa Chaueneēgŭx, pemaā nŭxŭ chixu i ngēma ore, yerŭ Croétanŭxŭtanŭwa nŭxŭ chacuáchiga ga pegŭmaā na penuēxŭ, rŭ tama aixcŭma wŭxigu na perŭxŭñŭēxŭ. ¹² Rŭ pemaā nŭxŭ chixu i ngēma erŭ ñuxre i pema rŭ ñaperŭgŭgŭ:

“Choma rŭ Pauruwe charŭxŭ”, ñaperŭgŭgŭ. Rŭ togue rŭ:

“Choma rü Aporuwe charüxü”, ñaperügügü. Rü togue rü:

“Choma rü Pedruwe charüxü”, ñaperügügü. Rü togue rü:

“Choma rü Cristuwe charüxü”, ñaperügügü.

¹³ ¿Rü ñuxäcü nixĩ i ngẽma? ¿Pexcèx rü Cristu rü marü niyauxye? ¿Éxna pema nüxü pecuèxgu rü choma i Pauru chiixü ga curuchawa pexcèx chipotaxü rü chayuxü? ¿Rü éxna pema nüxü pecuèxgu rü chauégagu yĩxü ga ípebaiüxü?

¹⁴ Rü Tupanana moxẽ chaxã, yerü taxúema pexü íchabaiüxẽ ga pemax. Rü Crispu rü Gayuxicatama nixĩ ga íchabaiüxẽxü. ¹⁵ Rü ngẽmacèx taxucürüwa texé tügü tixu na chauégagu ítabaiexü.

¹⁶ Rü yemáäcü aixcüma íchanabaiüxẽ ga Estéfanatanüxügü ta, natürü chauxcèx rü taxúema ga togue tüxü íchabaiüxẽ. ¹⁷ Yerü nüma ga Cristu rü tama choxü namu ga duüxügüxü na íchabaiüxẽxücèx, natürü choxü namu na duüxügümaã nüxü chixuxücèx i norü ore i mexü i tüxü maxèxẽxü. Rü nanaxwèxe i tauxchaxü i oremaã nüxü chixu i ngẽma ore. Erü ngèxguma chi ñoma nüxü cuèxüchixürü nüxü chixuxgu i ngẽma ore, rü ngürüächi i duüxügü rü tá chauguama narüxĩnüè rü tá nüxü inayarüngümaẽ na Cristu yĩxü ga tüxü maxèxẽcü ga yexguma curuchagu nayuxgux.

Cristuwa nixĩ ga Tupana inawéxü ga norü pora rü norü cuèx

¹⁸ Rü ngẽma ore na ñuxäcü tórü pecaducèx curuchagu nayuxü ga Cristu, rü wüxi i natücèxmamare nixĩ naxcèx i ngẽma duüxügü

i poxcuwa īxŭ. Natürü yixema na Tupana tūxŭ maxēxēxŭ, rü nūxŭ tacuèx na ngēma ore rü Tupanaārü pora yīxŭ. ¹⁹ Erü norü ore i ūmatūxŭwa rü ñanagürü ga Tupana:

“Rü tá ichayanaxoxēē i guxŭma i norü cuèx i ngēma duŭxŭgü i nūxŭ cuèxüchigüxŭ. Rü tá nūxŭ chaxo i ngēma duŭxŭgüarü cuèx”,

ñanagürü. ²⁰ Rü ñuxmax, Pa Chaueneēgüx, ¿Tupanapēxewa rü tacüwa namexŭ i ngēma duŭxŭgü i poraācü nūxŭ cuèxüchixŭ? ¿Rü tacüwa namexŭ i ngēma duŭxŭgü i Moiché ūmatūxŭ i mugüwa nguxēētaegüxŭ? ¿Rü tacüwa namexŭ i ngēma duŭxŭgü i meā nūxŭ cuèxgüxŭ i ñoma i naāneārü cuáchigagu na yadexagüxŭ? Erü guxŭma i ngēma cuèx i duŭxŭgü nagu rüxīnūēxŭ rü Tupanacèx rü taxuwama name. ²¹ Natürü nūma ya Tupana ya guxŭxŭma cuácü, rü tama nanaxwèxe na ñoma i naānecŭāx i duŭxŭgüarü cuágagu na yīxŭ i naxŭtawa nangugüxŭ i nūmagü. Natürü nanaxwèxe na ngēma norü ore i mexŭgagu na yīxŭ i namaxēxēēāxŭ i ngēma duŭxŭgü i yaxōgüxŭ woo togücèx rü natücèxmamare yixīgu i ngēma ore. ²² Ngēma Yudíugü rü nūxŭ nadaugüchaŭ i cuèxruŭgü i Tupanaārü poramaā ūxŭ. Rü ngēma Griégugü rü naxcèx nadaugü i ñoma i naāneārü cuèx. ²³ Natürü ngēma ore i toma nūxŭ tixuxŭ, rü Cristu ga curuchawa ipotacüchiga nixī. Rü ngēma ore rü naāēwa nangux i ngēma Yudíugü. Rü ngēma duŭxŭgü i tama Yudíugü ixīgüxŭcèx rü wūxi i natücèxmamare nixī. ²⁴ Natürü ngēma duŭxŭgü i Tupana dexŭ i Yudíugü rü ēxna tama Yudíugü ixīgüxŭ rü ngēma duŭxŭgücèx

Tupana inanawēx i norū pora rū norū cuēx ga yexguma pecaducēx nayuxgu ga Cristu. ²⁵ Rū yema Tupana ūxū ga yexguma nayuxgu ga Cristu rū muxūma i duūxūgūcēx rū wūxi i ngēāēmare nixī. Natūrū ngēma Tupana nagu rūxīnūxū rū guxūma i ñoma i naānecūāx i duūxūgūarū cuēxarū yexera nixī. Rū yexguma curuchagu nayuxgu ga Cristu rū muxūma ga duūxūgūcēx rū natura ga Tupana ga yexguma. Natūrū yexguma nixī ga inawēāxū ga ñuxācū guxū i duūxūgūarū yexera na naporaxūchixū. ²⁶ Pa Chaueneēgūx, name nixī i nagu perūxīnūē na ñuxācū Tupana pexū dexū na norū duūxūgū pixīgūxūcēx. Rū noxretama pixīgū na nūxū pecuēxūchixū ega duūxūgū pexū ngugūgu, rū noxretama pixīgū na āēxgacūgū pixīgūxū, rū noxretama pixīgū i ngēma itaarū dīēruāxūtanūxū pixīgūxū. Natūrū woo ngēma na pixīgūgu rū Tupana rū pexū nade na norū duūxūgū pixīgūxūcēx. ²⁷ Rū Tupana nanade ga yema duūxūgū ga togū ga duūxūgū nūxū ixuxgu rū taxuūma icuáxū. Rū yemaācū nanaxū ga Tupana na naxāneēxēēāxūcēx i ngēma duūxūgū i nūxū icuēxūchixū. Rū Tupana nanade ga yema duūxūgū ga togū nūxū ixuxgu rū turaexū. Rū yemaācū nanaxū ga Tupana na naxāneēxēēāxūcēx i ngēma duūxūgū i poraexū. ²⁸ Rū Tupana nanade ga yema duūxūgū ga togū nūxū oexū, rū ñoma i naānewa taxuūma ixīgūxū. Rū yemaācū Tupana nanaxāneexēē i ngēma duūxūgū i ñoma i naanewa norū ngemaxūgūmaā nūgū icuēxūūgūxū. ²⁹ Rū ngēmacēx taxucūrūwama texé tūgū ticuēxūū i Tupanapēxewa. ³⁰ Rū

nūmatama ga Tupana nixī ga Ngechuchu ya Cristuarū duūxūgūxū pexū yaxīgūxēēxū. Rū tatanūwa nanamu ga Cristu na nūma tūxna naxāāxūcēx i cuēx i aixcūma ixīxū, rū pecaduwa tūxū ínanguxūxēēxūcēx. Rū nūma ya Cristu nixī i tūxū namaxēxēēxū rū tūxū yamexēēgūxū na aixcūma ixūūnexūcēx napēxewa ya Tupana.
³¹ Rū ngēmacēx i Tupanaārū ore i ūmatūxūwa rū ñanagūrū:

“Rū ngēxguma texé tūgū icuēxūūchaūgu rū name
 nixī i tórū Corixū tikuēxūū”,
 ñanagūrū.

2

Cristu ga curuchawa ipotacūchiga

¹ Pa Chaueneēgūx, yexguma noxri petanūwa chaxūxgu na pemaā nūxū chixuxūcēx ga Tupanaārū ore i aixcūma ixīxū i Cristuchiga, rū tama ñoma nūxū cuēxūchixūrūūācūma pemaā chidexa, rū tama ore ga guxchaxūmaā nixī ga pemaā nūxū chixuxū. ² Yerū yexguma petanūwa chayexmagu, rū Cristuchigaxūxīcatama nixī ga pemaā chixuxū. Rū taxuūma ga tacū ga togu charūxīnū. Rū yemaācū Ngechuchu ya Cristu ga curuchawa ipotacūguxicatama nixī ga charūxīnūxū. ³ Rū yexguma petanūwa changuxgu rū nūxū chadau ga taxū ga guxchaxūgū ga petanūwa, rū yemacēx poraācū chaxoegaāē rū Tupanapewa chorū muūmaā chidurux.
⁴ Rū yexguma pemaā chideaxgu rū pemaā nūxū chixuxgu ga Tupanaārū ore, rū tama ñoma nūxū cuēxūchixūrūūācūma pemaā nūxū chixu na yemaācū pexū chanangúchaūxēēxū na

peyaxôgûxûcèx. Natürü Tupanaãe i Üünexûârü ngûxêemaã rü Tupanaârü poramaã nixĩ ga pexũ chanangúchaûxêexũ. ⁵ Rü yemaãcü Tupanaârü poramaã pemaã nüxũ chixu ga yema ore na Tupanagagu yîxũ na nüxũ peyaxôgûxũ, rü tama ñoma i naãnecûăx i duûxûgüarü cuágagu na yîxũ.

Tupana rü Naãe i Üünexûwa nügü tûxũ nacuèxêe

⁶ Natürü pemaã nüxũ chixu, rü ngêxguma natanüwa changêxmagu i ngêma duûxûgü i marü meãma yaxôgûxũ, rü ngêxguma nixĩ i chanangúxêexũ i ngêma aixcüma Tupanaarü cuèx i üünexũ. Natürü ngêma cuèx rü tama ñoma i naãnewa ne naxũ, rü bai i ñoma i naãneârü âêxgacügü i paxa tá iyarûxoxûwa ne naxũ. ⁷ Natürü ngêma cuèx rü Tupanawa nixĩ i ne naxûxũ. Rü ngêma cuèx nixĩ ga noxri tauta naãne ûxgu Tupanaxĩcatama nüxũ cuáxũ ga na ñuxâcü tá tûxna naxâãxũ i maxũ i taguma gúxũ. ⁸ Natürü yema Tupana nagu rûxîñûxũ, rü taxuûma ga ñoma ga naãnecûăx ga âêxgacü nüxũ nacuèx. Yerü yexguma chi aixcüma nüxũ nacuèxgügu ga yema Tupana nagu rûxîñûxũ rü tãu chima curuchawa nayapotagü ga guma mecü ya tórü Cori. ⁹ Rü ngemachiga nixĩ i Tupanaârü ore i ûmatûxûwa i ñaxũ:

“Rü ngêma duûxûgü i Tupanaxũ ngechaûgûxûcèx, rü nüma nanamexêe i tacü i taxúema nüxũ dauxũ, rü taguma texé nüxũ îñûxũ, rü bai i texé nagu rûxîñûxũ”,

ñaxũ. ¹⁰ Rü ngêma Tupana mexêexũ naxcèx i ngêma duûxûgü i nüxũ ngechaûgûxũ, rü ñuxma rü tûxũ nüxũ nacuèxêe i ngêma, yerü núma nanamu

ga Naāē i Üünexŭ na taxcèx nangoxēēāxŭcèx. Rŭ ngēma Naāē i Üünexŭ rŭ guxŭxŭma nacuèx, rŭ èixrŭxŭ i ngēma Tupanaxīcatama nŭxŭ cuáxŭ rŭ ta nŭxŭ nacuèx. ¹¹ Rŭ duŭxŭgŭtanŭwa rŭ ŷtexé nŭxŭ tacuèx na tacŭgu naxīnŭxŭ i wŭxi ya yatŭ? Rŭ naāēxīcatama nixī i nŭxŭ cuáxŭ i ngēma nagu naxīnŭxŭ i ngēma yatŭ. Rŭ ngēxgumarŭŭ ta Tupanaāē i Üünexŭxīcatama nixī i nŭxŭ cuáxŭ na tacŭgu naxīnŭxŭ ya Tupana. ¹² Rŭ yixema rŭ tama ñoma i naānecŭāx i naāē nixī ga iyauxgŭxŭ. Natŭrŭ tanayauxgŭ i ngēma Naāē i Üünexŭ ga Tupana taxcèx núma muxŭ na aixcŭma nŭxŭ icuáxŭcèx i guxŭma i ngēma mexŭgŭ ga Tupana norŭ ngechaŭmaā tŭxna āmarexŭ. ¹³ Rŭ ñuxma na pemaā nŭxŭ tixuxŭ i ngēmachiga, rŭ Tupanaāē i Üünexŭ toxna āxŭ i oremaā nixī i pemaā nŭxŭ tixuxŭ. Rŭ tama ore i torŭ cuèxwa tayaxuxŭmaā nixī i pemaā nŭxŭ tixuxŭ. Rŭ ngēmaācŭ nŭxŭ tixu i Tupanaāē i Üünexŭārŭ ore namaā i ngēma duŭxŭgŭ i aixcŭma Tupanaāē nawa ngēxmagŭxŭ. ¹⁴ Rŭ texé ya tama Tupanaāē i Üünexŭ tŭmawa ngēxmaxē, rŭ taxucŭrŭwa tanayaxu i ngēma Tupanaāē i Üünexŭ tŭxŭ nguxēēxŭ, erŭ tŭmacèx ya yixema duŭxē rŭ natŭcèxmamare nixī. Rŭ tama nŭxŭ tacuèxéga erŭ yixema Tupanaāē i Üünexŭ tŭmawa ngēxmaxēxīcatama tixī ya nŭxŭ cuáxe na tanangugŭxŭ na ñuxŭ ñaxŭchiga yīxŭ i ngēma Tupanaāē i Üünexŭ tŭxŭ nguxēēxŭ. ¹⁵ Rŭ yixema duŭxē ya Tupanaāē i Üünexŭ tŭmawa ngēxmaxē, rŭ meā tanangugŭ i guxŭma. Natŭrŭ ngēma togŭ i duŭxŭgŭ i tama Tupanaxŭ cuèxgŭxŭ, rŭ tax-

ucürüwama tūmaārū maxūxū nangugū ya yixema duūxē ya aixcūma Tupanaāē tūmawa ngēxmaxē.

¹⁶ Erū Tupanaārū ore i ūmatūxūwa rū ñanagürü:

“¿Texé nüxū tacuèx na tacūgu naxīnūxū ya tórū Cori? ¿Rū texé nüxū tacuèx na Tupanaxū taxucuxēxū?”

ñanagürü. Natürü yixema nixī i aixcūma nüxū icuáxū i ngēma Cristu nagu ruxīnūxū.

3

Pauru rū Aporu rū wūxigu Tupanaāxū napu-racūe

¹ Pa Chaueneēgūx, yexguma noxri petanūwa changuxgu, rū taxucürüwa ngēma duūxūgū i Tupanaāē nawa ngēxmaxūmaā chidexaxürüūācū pemaā chidexa. Natürü ñoma i naānecūāx i tama Tupanaxū cuèxgūxūmaā chideaxgurūū nixī ga pemaā chidexaxū. Yerü pema rū yexwacèx, peyaxōgū ga yexguma, rū yemacèx yexwacèx yaxōgūxūmaā chideaxürüūācū pemaā nüxū chixu ga Cristuchiga. ²⁻³ Rū taxchaxū ga oremaā pexū changúexēē, ngēxgumarūū i wūxi i ōxchana ega noxri nabuxgu rū naēgūnenixū ya taxchaācū yaxaxūne nüxna taxā. Rū yemaācū taxchaxū ga oremaā pemaā nüxū chixu ga Tupanaārū ore ga noxrix, yerü taxucürüwa nüxū pecuèxéga ga Tupanaārū ore ga guxchaxū. Rū ñuxma rū ta tama nüxū pecuèxéga i Tupanaārū ore i guxchaxū, erü ñoma tama yaxōgūxū i duūxūgürüūtama pemaxē. Rū dūcax, ngēxguma ñuxma rū ta pixāūxāchiwēxegu rū pegūmaā penuēgu, rū ngēmawa nangox na ngēma tama yaxōgūxürüūacūtama nagu perūxīnūēxū rū ñoma i naānecūāxürüūacūtama

na pemaxēxū. 4 Rū ngēxguma petanūwa wūxie ñágūgu rū:

“Choma rū Pauruwe charūxū”, ñágūgu, rū togue rū:

“Choma rū Aporuwe charūxū”, ñágūgu, rū ngēmawa nūxū tacuèx na ngēma duūxūgū i tama yaxōgūxūrūūācūma na pemaxēxū. 5 Rū ngēxguma meā nagu rūxīnūēgu, ģrū tacū chixī i choma i Paurux? rū ģtacū nixī i nūma i Aporux? Toma rū Tupanaārū duūxūgūmare tixīgū, rū togagu nixī ga nūxū peyaxōgūxū ga tórū Cori ya Ngechuchu. Rū wūxichigū ga toma rū tanaxū ga yema puracū ga tórū Cori toxna āxū. 6 Rū chauxūtawa nixī ga nūxū pexīnūēxū rū peyaxōgūxū ga Tupanaārū ore ga noxrix. Rū Aporu nixī ga pexū rūngūxēēcū na yexeraācū meā peyaxōgūxū ga yema ore. Natürū Tupana nixī ga pexū maxēxēēcū. 7 Rū ngēmacèx woo yīxema tūxira duūxūgūmaā nūxū ixuxe i Tupanaārū ore rū woo yīxema wixwena yexeraācū duūxūgūxū ngúexēēxē, rū taxuūma tixīgū. Natürū Tupana nixī ya guxūma ücū, erū nūma nixī i duūxūgūxū namaxēxēēxū. 8 Rū ngēmaācū ya yīxema tūxira duūxūgūmaā nūxū ixuxe i Tupanaārū ore, rū yīxema wixwena yexeraācū duūxūgūxū ngúexēēxē rū tawūxigumare i ngēma puracūwa. Natürū Tupana rū tá tūxū nanaxūtanū i tūmaārū puracū ya wūxichigū ngēxgumarūū na ñuxācū tanaxūxū i ngema puracū.. 9 Rū ngēmaācū i toma rū wūxigu Tupanaāxū tapuracūe. Rū ngēmaācū nixī i perū maxūwa napuracūxū ya Tupana na nūma nanaxwēxexūācūma pixīgūxūcèx. 10 Rū choma nixī ga Tupana choxū muxū na chaxira

pemaã nüxũ chixuxũcèx ga Cristuchiga. Rũ togũ nixĩ ga chowena yexeraãcũ pexũ ngúexẽẽxũ. Natürũ guxãma ya texé ya naxúxe i ñaã puracũ rũ name nixĩ i taxuãẽ na meã tanaxũxũcèx. ¹¹ Rũ ñaã puracũ rũ Ngechuchu ya Cristuwa nixĩ ga inaxügũxũ, rũ ngẽmacèx taxucürũwama texé tayangucuchixẽẽ i to i tüxũ maxẽxẽẽxũ. ¹² Rũ ñuxma na norũ puracũ ixũxũ i wüxichigũ i yixema, rũ tanaxwèxe i taxuãẽ na aixcũma meã naxũxũ i ngẽma. Erũ yíxema aixcũma meã naxúxe i norũ puracũ, rũ ñoma wüxi i ĩpataarũ üruũ i uirumũ rũ dīerumũ rũ nuta i mexẽchixũmaã üpataxũrũ tixĩ. Natürũ yíxema tama aixcũma meã naxúxe i ngẽma Cristuarũ puracũ rũ ñoma ĩpataarũ üruũ i chixexũ i naĩ rũ naĩxãtũ rũ dëxnemenèxãmaremaã üpataxũrũ tixĩ. ¹³ Natürũ ngẽxguma naguxgu i naãne, rũ tá nangox na ñuxãcũ naxũãxũ i Tupanaarũ puracũ i wüxichigũ i duũxũ. Erũ ngẽma ngunexũgu rũ tá nangẽxma ya üxũ ya taxüchine. Rũ ñoma tacũ üxũwa iguxũrũ tá nixĩ i Tupana nüxũ na üxũ i wüxichigũ i duũxũarũ puracũ na nüxũ nacuáxũcèx ngoxi aixcũma name rũ ěxna tama. ¹⁴ Rũ yíxema aixcũma meã naxúxe i Cristuarũ puracũ, rũ yima ĩpata ya taixũne ya tama üxũmaã ixaxũnerũ tá nixĩ i ngẽma tũmaarũ puracũ. Rũ tá Tupanaxũtawa tanayaxu i tũmaarũ natanũ naxcèx i ngẽma taxũxũ. ¹⁵ Natürũ yíxema tama aixcũma meã naxúxe i ngẽma puracũ, rũ yima ĩpata ya tama taixũne ya üxũmaã ixaxũnerũ tá nixĩ i ngẽma tũmaarũ puracũ. Rũ tá ngẽxma inayarũxomare i guxũma i ngẽma taxũxũ. Rũ tüxicatama tãütáma tixa ñoma wüxi i duũxũ i üxũemawa iyagoxũrũ. ¹⁶ ¿Tama ěxna nüxũ

pecuèx i pema rü Tupanapata na pixīgüxŭ, rü ngema Naãe ya Tupana rü pewa na namaxŭxŭ?
¹⁷ Rü ngëxguma texé pexŭ chixetanŭxëëgu, rü Tupana tá tŭxŭ napoxcu, erü Tupanapata ya nawa namaxŭne rü naxŭüne. Rü pematama nixĩ ya yima Tupanapata na pixīgüxŭ. ¹⁸ Tama name i texé tŭgŭtama tawomŭxëë. Rü ngëxguma petanŭwa texé tŭgŭgu rŭxĩnŭgu na wŭxi i duŭxŭ i nŭxŭ cuáxe na tiĩxŭ i ñoma i naãnewa, rü name nixĩ i ñoma taxuŭma tacuáxŭrŭ tŭgŭ tixĩxëë. Rü ngëxguma tá nixĩ i wŭxi i duŭxŭ i aixcŭma nŭxŭ cuáxe tá tiĩxŭ. ¹⁹ Erü ñoma i naãneärŭ cuèx rü wŭxi i ngëãëmارة nixĩ i Tupanacèx. Erü Tupanaärŭ ore i ũmatŭxŭwa rü ñanagŭrŭ:

“Rü ngëma duŭxŭgŭ i nŭgŭgu rŭxĩnŭxŭ na nŭxŭ cuèxŭchigŭxŭ yĩxŭ, rü norŭ cuèxgutama ñanatŭexëë ya Tupana”,
 ñanagŭrŭ. ²⁰ Rü toxnamana i Tupanaärŭ orewa rü ñanagŭrŭ ta:

“Tórŭ Cori ya Tupana rü nŭxŭ nacuèx na taxuwama namexŭ i ngëma norŭ ñnŭ i ngëma duŭxŭgŭ i ñoma i naanewa cuèxwa ngugŭxŭ”,
 ñanagŭrŭ. ²¹ Rü ngëmacèx tama name i texé tŭgŭ ticuèxŭxŭ ega duŭxŭgŭärŭ cuèxwamare tarŭxŭxgu.. Erü Tupana rü marŭ pexna nanaxã i guxŭma na pexrŭ yĩxŭcèx. ²² Rü ngëmacèx i choma i Pauru, rü taeneë ya Aporu, rü taeneë ya Pedru, rü ñoma i naãne, rü torŭ maxŭ, rü torŭ yu, rü ñomatama i ngunexŭ, rü moxŭärŭ ngunexŭ, rü guxŭma i ngëma rü pexrŭ nixĩ. ²³ Rü pematama rü Cristuarŭ pixīgŭ. Rü Cristu rü Tupanaärŭ nixĩ.

4

Yema ngúexŭgŭ ga Ngechuchu imugŭxŭãrŭ puracŭchiga

¹ Rŭ ngēmacèx tanaxwèxe i tomaã nagu perŭxĩnŭê na Cristuarŭ puracŭtanŭxŭmare na tixĩgŭxŭ. Rŭ nŭma nixĩ i toxŭ namuxŭ na pexŭ tangŭexēxŭcèx ga yema ore ga noxri Tupanaxĩcatama nŭxŭ cuáxŭ. ² Rŭ ngēxguma texé tacŭ rŭ puracŭ tŭxna ãxgu, rŭ name nixĩ i aixcŭma tayanguxēē i ngēma puracŭ i tŭxna taxãxŭ na ngēmaãcŭ itanawéxŭcèx na aixcŭma wŭxi i duŭxŭ i mexŭ tixĩxŭ. ³ Rŭ ngēmacèx i ñuxma na meã chayanguxēēchaŭxŭ i ngēma puracŭ i Tupana choxna ãxŭ, rŭ taxucèxma chaugŭcèx chaxoegaãē ega woo choxna pecagu rŭ êxna tacŭ rŭ ãēxgacŭgŭ choxna caxgu naxcèx i ngēma puracŭ i chaxŭxŭ. Rŭ woo i chomatama rŭ taxuxŭcèxma íchicuèx na ngextá chixri chanaxŭxŭ i ngēma puracŭ. ⁴ Natŭrŭ ñuxma na chomatama nagu charŭxĩnŭxŭ na nataxuŭma i chorŭ chixexŭ i Tupanapēxewa, rŭ tama ngēmacèx Tupana choxŭ nadau na changearŭ pecaduãxŭ. Erŭ nŭmatama ya tórŭ Cori ya Tupana nixĩ i aixcŭma choxŭ nacuáarŭ maxŭãxŭ. ⁵ Rŭ ngēmacèx tama name na toxŭ pengugŭarŭ maxŭãxŭ naxŭpa na núma naxŭxŭ ya tórŭ Cori. Natŭrŭ name nixĩ i nŭxŭ ípenanguxēē, erŭ nŭma tá nixĩ i nangoxēēãxŭ i guxŭma i ngēma ñuxma icúxŭ rŭ guxŭma i ngēma duŭxŭgŭ naãewa nagu rŭxĩnŭêxŭ. Rŭ ngēxguma tá nixĩ ya Tupana i tŭmamaã nataãxŭ ya wŭxichigŭ ya yixema aixcŭma mexŭ ŭgŭxe. ⁶ Pa Chaueneēgŭx, perŭ mexŭcèx nixĩ i pemaã nŭxŭ tixuxŭ i ngēma ore na

ngema Tupana naxwèxexũãcūma pemaxēxũ. Rū choma rū Aporu nixĩ i perũ cuèxruũgũ tixĩgũxũ na towa pengúexũ na Tupanaãrũ ore pemaã nũxũ ixuxũrũũãcũ penaxũxũ. Rū ngẽmacèx tama name na wũxi i perũ ngxẽẽtaexũmaã petaãẽgũxũ rū to rū nũxũ pexoexũ. ⁷ Rū ñũxma rū pexna chaca, ¿rũ texé tixĩ ya yíxema pemaã nũxũ ixuxe na togũarũ yexera pexũ ixĩxẽexẽ? ¿Erũ guxũma i ngema cuèx i pexũ ngẽxmaxũ rū Tupana pexna nanaxã? Rū ñũxma na nũma pexna naxããxũ i ngẽma cuèx ¿rũ tũxcũũ pegũ picuèxũũgũ ñoma pematama perũ poramaã penayaxuxũrũũ? ⁸ Rū pegũgu perũxĩnũẽgu rū aixcūma marũ meãma Tupanaxũ picuèxũchi rū marũ pexũ nangẽxma i guxũma i tacũ i penaxwèxexũ na naxũtawa pengugũxũcèx. Rū pegũgu perũxĩnũẽgu rū ñoma ãẽxgacũgũ i taxũrũũ pixĩgũ rū taxuũma toxũtawa penaxwèxe i ñũxmax. ¡Chierũ aixcūma Tupanapẽxewa ãẽxgacũgũ pixĩgũgu na toma rū ta wũxigu pemaã ãẽxgacũgũ na tixĩgũxũcèx! ⁹ Rū toma na Ngechuchu toxũ imugũxũ, rū chauxcèx rū wixwe toxũ nawogũ ya Tupana. Rū ñoma poxcuexũ i yuewa íxũrũũ tixĩgũ. Rū ñoma wũxi i tacũ i nũxũ nacugũexũrũũ tixĩgũ i napẽxewa i Tupanaãrũ orearũ ngeruũgũ i daxũcũãx, rū napẽxewa i ñoma i naãnecũãx i duũxũgũ, rū napẽxewa i guxũma i tacũ i Tupana ũxũ. ¹⁰ Rū ñũxma na Cristuwe tarũxĩxũ, rū ngẽmacèx taxuũma icuáxũ toxũ nawogũ i duũxũgũ, natũrũ i pema rū pegũgu perũxĩnũẽgu rū guxũxũma pecuèx i Cristuchiga. Toma nũxũ tacuèx na duũxũgũpẽxewa taturaexũ, natũrũ i pema rū pegũgu perũxĩnũẽ na aixcūma peporaexũ. Rū duũxũgũ toxũ naxo, natũrũ pexũ

nangechaŭgü. ¹¹ Rū ñuxma rü ta tama inayacuèx na ngúxŭ tingegüxŭ, erü ñuxma rü ta taiya toxŭ nangux, rü tiṭawae, rü tangexchiru. Rū duŭxŭgü rü chixri tomaã nachopetü, rü tangepata. ¹² Rū tipae na yeŭcürü toxmëxmaã tapuracüeechaxŭ. Rū duŭxŭgü rü ṭacü tomaã nixugüe, natürü i toma rü mexŭ i oremaã tanangäxŭgü. Rū towe ningëxŭtanü, natürü yaxna namaã taxĩnüe. ¹³ Rū chixri tochiga nidexagü, natürü i toma rü meã nachiga tidexagü. Rū ñoma guxchirexŭ nadaugüxŭrŭŭ tomaã nixĩgü, rü ñoma duŭxŭgü i taxuwama mexŭäcŭ toxŭ nixĩxëë. Rū ñuxma rü ta ngemagutama tomaã naarüxĩnüe. ¹⁴ Tama pexcëx chanaxümatü i ñaã popera na pexŭ chaxãneëxëxŭcëx. Natürü pexcëx chanaxümatü na pexŭ chixucuxëgüxŭcëx chauxacügüxŭchirŭŭ, erü pexŭ changechaŭ. ¹⁵ Erü woo nangëxmagu i muxŭma i perü nguxëëruŭgü i Cristuchiga pexŭ ngúexëëxŭ, natürü chaxicatama nixĩ i penatü chiĩxŭ ga Cristuxŭ na peyaxuxŭwa. Yerü chauxŭtawa nixĩ ga noxri ga penayaxuxŭ ga Ngechuchu ya Cristuarü ore i tŭxŭ maxëxëëxŭ. Rū ngëmacëx chaxicatama nixĩ i penatü chiĩxŭ i perü ōwa. ¹⁶ Rū ngëmacëx pexŭ chacëëxŭ na chauxrŭxŭ meã pemaxëxŭ. ¹⁷ Rū ngëmacëx pexŭtawa chanamu ya Timutéu ya poraäcŭ nüxŭ changechaŭcŭ ya chaune ixĩcŭ i tórü Coriarü orewa. Rū nüma rü aixcuma meã nayanguxëë i guxŭma i ngëma nagu chanamuxŭ. Rū nüma tá pexna nüxŭ nacuèxächixëë na ñuxäcŭ Ngechuchu ya Cristu naxwëxexŭäcuma meã chamaxŭxŭ rü chanangúexëëxŭ ga yema yaxögüxŭ ga natanügu chixŭgüxŭ. ¹⁸ Rū ñuxre i pemagü rü pegü

picuèxüügü, erü nagu perüxĩnüē na tagutáma pexütawa íchayadauxŭ. ¹⁹ Natürü ngëxguma nanaxwèxegu ya tórü Cori, rü paxa tá ngëma chaxü na pexü íchayadauxŭcèx. Rü ngëxguma rü tá chomaxŭchi nüxŭ chadau ngoxi ngëma duŭxŭgü i nügü icuèxüügüxŭ nüxŭ nangëxma i Tupanaârü pora rü ěxna yadoragümare. ²⁰ Erü Tupanaarü pora rü tama nüxŭ tixumare, natürü nagu ítamaxē i ngema pora. ²¹ ¿Rü ñuxma rü tacü ěxna nixĩ i penaxwèxexŭ i pema? ¿Penaxwèxe na pexü chingagüxŭ i ngëxguma ngema changuxgu, rü ěxna penaxwèxe na pexü changechaŭăcŭma rü pemaă chamecŭmaăcŭma pexü na íchayadauxŭ?

5

Duŭxŭgü i chixri maxëxŭchiga

¹ Rü duŭxŭgü nüxŭ nixugügü rü wüxi i yatü i petanüwa rü naërŭcŭmaâtama naxâmèx. Rü ngëma nixĩ i pecadu i poraăcŭ chixexŭchixŭ, erü woo ngëma duŭxŭgü i tama yaxôgŭxŭtanüwa rü tama ngëmaăcŭ naxüpetü. ² ¿Rü ñuxăcŭ i pema i ngëxguma i pegü picuèxüügŭamaxŭ? Rü narŭmemaē chi nixĩ na poraăcŭ pengechaŭgŭxŭ. Rü ngëma yatü i ngëma chixexŭ ũxŭ rü name nixĩ na ípenamuxŭchixŭ i petanüwa. ³ Rü woo tama petanüwa changëxmagu i chomax, natürü guxŭguma pegu charŭxĩnü. Rü ñoma pexütawa changëxmaxŭrŭrŭ rü tórü Cori ya Ngechuchu ya Cristuégagu pemaă nüxŭ chixu na tacü tá namaă pexŭxŭ i ngëma duŭxŭ. ⁴ Rü name nixĩ i tórü Cori ya Ngechuchu ya Cristuégagu pengutaquëxegü. Rü nüma ya tórü Cori ya Ngechuchu rü tá

napetanügu na pexŭ naporaexēēxŭcèx. Rŭ choma rŭ tá pexna chachuēāchi i chorŭ yumŭxēwa. ⁵ Rŭ ngēma norŭ poxcu i tá nüxna pexāxŭ i ngēma yatŭ, rŭ ngēma tá nixī na ípenamuxŭchixŭ i petanŭwa na Chataná ngúxŭ nüxŭ ingexēēxŭcèx. Rŭ ngēmaācŭ tá inayarŭxo i naxŭneārŭ ngúchaŭ i chixexŭ, natŭrŭ naāē rŭ tá namaxŭ i ngēxguma wena núma naxŭxgu ya tórŭ Cori ya Ngechuchu. ⁶ Rŭ tama name i pema rŭ pegŭ picuēxŭŭ naxcèx i ngēma pexŭxŭ! ¿Tama ēxna nüxŭ pecuēx i ngēma ore i ñaxŭ:

“Wŭxi i íraxŭ i pāŭārŭ puxēēruŭ rŭ taxŭma i pāŭchara nipuxēē”, ñaxŭ? ⁷ Rŭ ngēmacèx name nixī i nüxŭ perŭxoe i guxŭma i nuxcŭmaŭxŭ i pecŭma i pexŭ chixexēēxŭ. Rŭ ngēxguma ngēmaācŭ penaxŭxgu, rŭ ñoma ngexwacaxŭxŭ i pāŭ i ngearŭ puxēēruŭāxŭ i Ūpetŭchigaarŭ petawa ingŭxŭrŭŭ tá pime. Rŭ ñŭxma i pema rŭ aixcŭma ngexwacaxŭxŭ i duŭxŭgŭ pixŭgŭ, yerŭ Cristu rŭ ñoma wŭxi i carnerurŭŭ marŭ tachicŭŭ tórŭ pecaducèx nayu. ⁸ Rŭ ngēmacèx name nixī i nüxŭ tarŭxoe i nuxcŭmaŭxŭ i tacŭma i chixexŭgŭ rŭ aixcŭma Tupanagu tarŭxŭnŭē rŭ meā naxcèx tamaxē, erŭ ngexwacaxŭxŭ i norŭ duŭxŭgŭ tixŭgŭ. ⁹ Nŭxŭraŭxŭ ga chorŭ poperawa rŭ pemaā nüxŭ chixu na tama natanŭgu pexāgŭxŭ i ngēma duŭxŭgŭ i naī i ngemaā naxŭneārŭ ngúchaŭ ŭgŭxŭ. ¹⁰ Natŭrŭ yexguma yema ñachagu pexŭ, rŭ tama pemaā nüxŭ chixu na nüxna pixŭgachitanŭxŭchixŭ i ngēma duŭxŭgŭ i tama yaxŭgŭxŭ i naī i ngemaā maxēmarexŭ, rŭ ēxna ngēma duŭxŭgŭ i guxŭma i tacŭ nŭgŭna nugŭchaŭgŭxŭ, rŭ ēxna ngŭtèēxgŭxŭ,

rü êxna ngêma duûxûgü i tupananetachicünèxãxû icuèxüûgûxû. Erü ngêxguma chi naxchaxwa ípechoûxgu i ngêma duûxûgü, rü chi taxucürüwa i ñoma i naânewa pengêxmagü. ¹¹ Natürü yexguma pemaã nüxû chixuxgu na tama natanügu pexâgûxû i ngêma duûxûgü i chixri maxêxû, rü nachiga chidexa i ngêma duûxûgü i nügü ixugûxû na peeneêgü i yaxôgûxû na yixîgûxû natürü naĩ i ngemaã maxêxû, rü êxna aüexû, rü êxna tupananetachicünèxãxû icuèxüûgûxû, rü êxna oregütèèxgûxû, rü êxna ngâxêwèxegûxû, rü êxna ngîtèèxgûxû. Rü ngêma duûxûgü nixî i pemaã nüxû chixuxû na tama namexû na natanügu pexâgûxû rü bai i namaã na pechibüexû. ¹²⁻¹³ Erü tama choxmêxwa nangêxma na nüxna chaçaxû i ngêma duûxûgü i tama Tupanaãxû yaxôgûxû. Rü Tupana tá nixî ya nüxna çacü i ngêma duûxûgü. Natürü i pema rü pemêxwa nangêxma na nüxna peçaxû i ngêma peeneêgü i yaxôgûxû i tama meã maxêxû. Rü name nixî i petanüwa ípenamuxûchi i ngêma duûxû i chixri maxûxû.

6

Ngêxguma tacü rü guxchaxû tüxû ngêxmagu taeneêmaã, rü tama name i âêxgacügü i tama yaxôgûxûpêxewa tayamexêê i ngêma

¹ Rü ngêxguma wüxie i pema pexû nangêxmagu i tacü rü guxchaxû i wüxi i peeneê i yaxôxûmaã, ¿rü tüxcüü wüxi i âêxgacü i tama yaxôxûârü ngûxêêcèx ípeyaca na nüma pexû namexêêãxûcèx i ngêma perü guxchaxûgü? ¿Rü tama êxna inamexû i ngêma peeneêgü i yaxôgûxû na namexêêgûxû i

ngēma perū guxchaxūgū? ² ¿Tama ēxna nūxū pecuèx na yixema na yaxōgūxū tá yīxū i naāneārū guxgu nūxna icagūxū i guxūma i ñoma i naānecūāx i duūxūgū? Rū ñuxma na pema tá yīxū i ñoma i naānecūāx i duūxūgūxū picagūxū, ¿rū tūxcūū taxucūrūwa i pematama penamexēē i ngēma perū guxchaxūgū i írachiréxū? ³ ¿Tama ēxna nūxū pecuèx rū woo ngēma daxūcūāx i Tupanaārū orearū ngeruūgū, rū yixema tá yīxū i nūxū icagūxū? Rū ngēmacèx nixī i yexeraācū pemēxwa nangēxmaxū na ñuxācū penamexēēxū i ngēma guxchaxūgū i ñoma i naānewa pexū ngēxmaxūxū.

⁴ Rū ngēmacèx, ngēxguma tacū rū guxchaxū pexū ngēxmagu i ñoma i naānewa, ¿rū tūxcūū i ngēma āēxgacūgū i tama yaxōgūxūxūtawa pegū ípeyaxuaxūgūxū na pexū namexēēgūāxūcèx i ngēma? ⁵ Rū pemaā nūxū chixu i ngēma ore na pexāneēxūcèx. ¿Éxna tataxuma i petanūwa ya wūxie ya nūxū cuáxe na tanamexēēxū i ngēma guxchaxūgū i petanūwa ngēxmaxū? ⁶ Rū tama pegūmaā penuēxīcatama, natūrū naetū rū āēxgacūgū i tama yaxōgūxūxūtawa pexī na penamexēēxūcèx i ngēma perū guxchaxūgū. ⁷ Rū ngēma na pegūmaā penuēxū, rū ngēma rū poraācū chixexū nixī. ¿Rū tūxcūū tama yaxna namaā pexīnūē i ngēma guxchaxūgū i peeneē pemaā ūxū? ¿Rū tūxcūū tama namaā peporae ega texé perū tacūcèx ngīxgux? ⁸ Natūrū i pema rū poraācū chixexū pexūe, erū woo peeneēgū i yaxōgūxūāxū rū ta pengix.. ⁹⁻¹⁰ ¿Tama ēxna nūxū pecuèx na ngēma duūxūgū i chixexū ūgūxū rū nataxuxūtama i nachica i ngextá Tupana āēxgacū íyīxūwa? ¡Rū

tama name i pegütama pewomüxëëgü! Erü ngextá Tupana ãëxgacü íyĩxüwa rü nataxütáma i nachica i ngëma duüxügü i naĩ i ngemaã ipexü, rü ngëma duüxügü i tupananetachicünëxãxü icuëxüügüxü, rü ngëma duüxügü i naxmëxëchita rü ëxna nateechita ngëãëxü, rü ngëma yatügü i naxrüü yatüxümaã ngëãëxü, rü ngëma ngĩtëëxgüxü, rü ngëma duüxügü i nügünaxica nanuxüchixü i norü ngëmaxügü, rü ngëma duüxügü i ngãxëwëxegüxü, rü ngëma duüxügü i oregütëëxgüxü, rü ngëma duüxügü i womüxëëwëxegüxü. Rü guxüma i ngëmagü rü nataxütáma i nachica i ngextá Tupana ãëxgacü íyĩxüwa. ¹¹ Rü yexgumarüütama pixĩgü ga ñuxre ga pema ga üpax. Natürü i ñuxma ya Tupana rü marü pexü ínanapi i perü chixexü na noxrüxicatama pixĩgüxüçèx. Rü ñuxma rü aixcüma napëxewa pime yerü Naãë i Üünexü rü tórü Cori ya Ngechuchu ya Cristuégagu marü perü pecaduna pexü ínanguxüxëë.

Ñuxãcü naxüüne i taxüne

¹² Rü ñuxre i pema rü ñaperügügü:

“Rü marü name na chanaxüxü i ngëma chanaxwëxexü”, ñaperügügü. Rü aixcüma nixĩ i ngëma, natürü tama guxü i ngëma ixügüxü rü tüxü name. Rü aixcüma nixĩ i Tupana choxü ínguxuchixëëxü na chanaxüxüçèx i ngëma chanaxwëxexü, natürü tama name na tacü rü chixexügu chaugü changuxëëxü na chomaã inacuáxüçèx. ¹³ Rü ngëxgumarüü ta rü ñuxre i duüxügü rü ñanagürügü:

“Rü õna rü taxü necèx nixĩ, rü taxüne rü õnacèx nixĩ”, ñanagürügü. Rü aixcüma ngëmaãcü nixĩ,

natürü ya Tupana rü tá inayanaxoxēē i guxūma i ngēma. Rü taxūne rü tama naī i ngemaā namaā na ingēāēmarexūcèx nixī. Erü taxūnemaā nixī i naxūxū i tórü Coriarü ngúchaŭ. Rü tórü Cori nixī ya taxūnexū maxēēcū. ¹⁴ Rü yema Tupana wena namaxēēxūrū ga tórü Cori ya Ngechuchu, rü ngēxgumarū tá ta norü poramaā wena tūxū namaxēēē. ¹⁵ ¿Rü tama ēxna nūxū pecuèx na ngēma pexene rü Cristuarü na yīxū? ¿Rü ñuxācū i ngēma chaxune i Cristuarü ixīxū rü ngexū i ngēāēxūmaā inapexū? Taxucürüwama ngēmaācū nixī. ¹⁶ ¿Rü ēxna tama nūxū pecuèx ega wūxi i ngexū i ngēāēxūmaā inapexgu ya wūxi ya yatü rü ngēma taxre i naxūne rü wūxitama i naxūne yīxū? Erü Tupanaārü ore i ümatūxūwa rü ñanagürü:

“Ngēma taxre i naxūne rü wūxitama i naxūne tá nixī”,

ñanagürü. ¹⁷ Natürü ngēxguma wūxi i duūxū rü tórü Cori ya Cristuaxū yaxōōxgu, rü ngēma naāē i ngēma duūxū rü Cristuāēmaā wūxigutama narūxīnūē. ¹⁸ Rü ngēmacèx name nixī na nūxū perūxoexū i pexeneārü ngúchaŭ na pexūxū. Rü guxūma i togü i pecadu i wūxi i duūxū üxū rü tama naxūnexū nachixexēē. Natürü ngēma na naī i ngemaā nangēāēxū rü ngēma waxi nixī i naxūnexū chixexēēxū. ¹⁹ ¿Tama ēxna nūxū pecuèx i pexene rü Tupanaāē i Üünexūpata na yīxū? Rü pegu nixī i naxāchiūxū i ngēma Naāē i Üünexū i Tupana pexna muxū. Rü ngēmacèx i pema rü tama pegüarü yoratama pixīgü. ²⁰ Erü Tupana rü marü pexcèx nataxe rü poraācū nūxū petatanü. Rü ngēmacèx penaxwèxe i ngēma pexenemaā meā Tupanacèx

pemaxē na ngēmaācū namaā penataxēēxū ya Tupana.

7

Ucuxēgū i āmēxchiga

¹ Rū ñuxma rū tá pexū changāxū ga yema āmēxchiga ga choxna naxcēx peçaxū ga perū poperawa. Rū narūmemaē chi nixī i noxtacūma tama naxāmax ya yatū. ² Natūrū ngēma na naxūneārū ngúchaū na naxūgūmarexū i duūxūgū, rū narūmemaē nixī i wūxichigū ya yatū rū na naxāmaxū, rū wūxichigū i nge rū na naxātexū. ³ Rū yima yatū ya āmacū rū taxucūrūwama naxmēxna nūgū ninuxū. Rū ngēma nge i ātecū rū taxucūrūwama ngītena ngīgū iyanuxū. ⁴ Erū ngēma nge i ātecū rū tama ngīgūxūneārū yoratama iyixī, erū ngīte nixī ya ngīxīneārū yora ixīcū. Rū ngēxgumarūū ya ngīte rū tama nūgūxūneārū yora nixī, erū naxmēx iyixī i naxūneārū yora ixīcū. ⁵ Rū tama name i wūxi ya yatū rū namēxna nūgū ninuxū, rū ēxna wūxi i ngecū rū ngītena ngīgū iyanuxū, ega tama nūgūmaā namexēēāgu na ñuxre i ngunexū tama nūgūmaā namaxēxū naxcēx na nayumūxēgūxū. Rū ngēmawena rū name nixī na wenaxārū noxrirūū nūgūmaā namaxēxū na tama Chataná nūxna ñnūxūcēx na chixexūgu nayixēēāxūcēx. ⁶ Rū guxūma i ñaā ore i pemaā nūxū chixuxū i āmēxchiga rū ātechiga rū tama wūxi i mu nixī i ngēma. Natūrū pemaā nūxū chixumare na nūxū pecuāxūcēx na namexū i ngēmaācū na penaxūxū. ⁷ Rū chomatama nagu charūxīnū rū chierū name nixī ega choma chamaxūxūrūū

namaxêgu i guxûma i duûxûgü. Natürü Tupana rü wüxichigü i duûxûna nanaxâ i nacüma na ñuxăcû namaxêxûcêx rü ñuxăcû nagu naxîñuxûcêx. Rü ngêmacêx tama guxâma tawûxigu. ⁸ Rü ngêma ngemêxgûxû rü ngetegûxû rü yutegûxû rü namaâ nüxû chixu rü narûmemaê nixî i chauxrûû tama naxâmêx rü tama naxâte. ⁹ Natürü ngêxguma wüxi i duûxû taxucûrûwa naxûneârü ngúchaûmaâ naporagu, rü name nixî na naxâmaxû rü êxna naxâtêxû. Erü narûmemaê nixî i noxtacüma naxâmêx rü êxna naxâte na tama ngema norü ngúchaûgagu düxwa chixexûgu nanguxûcêx. ¹⁰ Natürü yîxema marü âmaxê rü âtexe, rü tûmamaâ nüxû chixu na tama namexû na tûmatêxû na ítatâxû. Rü ngêma mu rü tórü Coriarü mu nixî, rü tama choxrü nixî. ¹¹ Natürü ngêxguma chi ngürüâchi wüxi i ngexû natêxû ítêxgu, rü name nixî i noxtacüma nangete rü êxna wena natecêx nataegu. Rü ngêxgumarûû ta ya yatü rü tama name i namêxû ínatêx. ¹² Rü ñuxma rü choxû nangêxma i wüxi i ore i tûmacêx ya yîxema âmaxê ngîmaâ i wüxi i nge i tama yaxôxcü. Rü ngêma ore rü choxrûtama nixî rü tama tórü Coriarü nixî. Rü ngêxguma wüxi ya yatü ya ôcü ngîmaâ âmaxgu i wüxi i nge i tama yaxôxcü, rü tama name i ngîxû ínatêx, ega ngîma rü aixcüma namaâ naxâtechaûgu. ¹³ Rü ngêxguma wüxi i nge i yaxôxcü âtegu namaâ ya wüxi ya yatü ya tama yaxôcü, rü tama name i ínatêx ya yima ngîte ega nüma ya yima yatü rü aixcüma ngîmaâ naxâmêxchaûgu. ¹⁴ Rü yima yatü ya tama yaxôcü, rü namêx i yaxôxcügagu Tupana nüxû nacuêx. Rü ngêma ngecü i tama yaxôxcü, rü ngîte ya yaxôcügagu Tupana ngîxû nacuêx. Erü

ngēxguma chi tama ngēmaācū yixīgu, rü chi ngēma naxācūgū rü duūxūgū i tama yaxōgūxūācūgūrūū tā nixīgū. Natürü i ñuxma ya naxācūgū rü marü Tupana tüxū nacuēx. ¹⁵ Natürü ngēxguma yima yatü ya tama yaxōcū rü namēxū ínátāxchaūgu rü įnoxtacūma ngīxū ínátá! Rü ngēxgumarūū ega ngēma ngecū i tama yaxōcū rü ngītēxū ínátāxchaūgu, rü įnoxtacūma ngītēxū ínátá! Rü ngēxguma ya yima yatü ya yaxōcū rü marü name ega wena naxāmēxgu. Rü ngēma ngecū i yaxōcū rü marü name ega wena naxātegu. Erü Tupana pēxū nade na pegū pengechaūgūxūcēx. ¹⁶ Rü ngēmacēx, Pa Ngecū i Tupanaāxū Yaxōxcūx, rü ngēxguma cute i tama yaxōxū cuxū ítāxchaūgu, namē nixī i tama cunachūxu, erü tama nüxū cucuēx ngoxi tá nüxū cuyaxōxēē i ngēma cute rü ēxna tama. Rü cumax, Pa Yatü ya Yaxōxcūx, rü ngēxguma cuxmēx i tama yaxōxū cuxū ítāxchaūgu, rü name nixī i tama cunachūxu, erü tama nüxū cucuēx ngoxi tá ngixū cuyaxōxēē i ngēma cuxmēx rü ēxna tama. ¹⁷ Rü ñuxma rü pemaā nüxū chixu rü nüma ga Tupana rü wūxichigū ga duūxēna nanaxā ga tümaārū cuēx na tümaārū maxūmaā itacuáxūcēx rü meā tanaxūxūcēx i ngēma puracū ga noxri tüxū yexmaxū ga tauta Tupana tümacēx caxgu. Rü ngēma nguxēētae nixī i namaā chanangúexēēxū i guxūma i yaxōgūxū i wūxichigū ya tupaucawa ngēxmagūxū. ¹⁸ Rü ngēxguma Tupana naxcēx caxgu i wūxi i duūxū i marü Yudíugūrūū íwiechēxmüpēxechiraūxū, rü nüetama nixī ega ngēmaācūtama yixīgu. Rü ngēxguma Tupana nayauxgu i wūxi i duūxū i tama íwiechēxmüpēxechiraūxū, rü

nüetama nixĩ ega ngẽmaãcütama yixĩgu. ¹⁹ Erü Tupanapẽxewa rü nüetama nixĩ ega wüxi i duũxũ rü ínawiechẽxmüpẽxechiraũgu rü êxna tama. Erü ngẽma Tupana aixcũma naxwẽxexũ nixĩ na naga naxĩnũxũ i wüxichigü i duũxũ. ²⁰ Rü wüxichigü i duũxũ rü name nixĩ i nawatama napuracü ga yema puracü ga nüxũ yexmaxũ ga yexguma Tupana noxri naxcèx caxgu. ²¹ Rü yexguma wüxi ga coriarü duũxũ quixĩyane Tupana cuxcèx caxgu, rü tama name i ngẽmacèx cuxoegaãẽ. Natürü ngẽxguma cuxũ natauxchagu na nüxna ícunguxuchixũ i ngẽma cori, rü marü name na ícunguxuchixũ. ²² Rü cuma ga na cucoriãxyane cuxcèx naçaxũ ga Tupana, rü name nixĩ i nüxna cucuèxãchi na Cori ya Cristu pecaduwa cuxũ ínguxuchixẽẽxũ. Rü cuma ga na cungearü coriãxyane cuxcèx naçaxũ ga Tupana, rü name nixĩ i nüxna cucuèxãchi na tórü Cori ya Cristuarü duũxũ quiĩxũ i ñuxma na nüxũ cupuracüxcèx. ²³ Tupana rü marü pexcèx nataxe rü poraãcü nüxũ petatanü. ¡Rü ngẽmacèx i ñuxma rü tãütáma naga pexĩnüẽ i ngẽma duũxũgü i wenaxârü ñoma i naãneârü chixexũwa pexũ gagüchaũxũ! ²⁴ Rü name nixĩ, Pa Chaueneẽgũx, i wüxichigü i pema rü meã Tupanapẽxewa penaxüama ga yema puracü ga noxri pexũ yexmaxũ ga yexguma Tupana pexcèx caxgu. ²⁵ Rü ñuxma rü tá pemaã nüxũ chixu i nachiga i ngẽma duũxũgü i ngemèxgũxũ rü ngetegũxũ. Rü tórü Cori ya Ngechuchu rü taxuũma i mu choxna naxã i ngẽmachiga. Natürü tá pemaã nüxũ chixu i ñuxãcü nagu charüxĩnü i ngẽmachiga. Rü ngẽma chorü ore rü aixcũma

nixĩ erũ choma nixĩ i wũxi i duũxũ ga nũxũ changechaũtũmũũĩcũma choxũ nayaxuxũ ga tũrũ Cori. ²⁶ Natũrũ ngema ñuxma nũxũ idauxũ i guxchaxũgũgagu rũ chauxcẽx rũ chi name i tama nixãmẽx i ngẽma yatũgũ i ngemẽxgũxũ. ²⁷ Rũ ngẽxguma marũ cuxãmẽxgu rũ tama name i ngĩxũ ícutẽx. Natũrũ ngẽxguma cungemẽxgu rũ name i tama cuxãmẽx. ²⁸ Natũrũ ngẽxguma cuxãmẽxgu rũ tama pecadu nixĩ i ngẽma. Rũ ngẽxguma wũxi i paxũ ãtegu rũ tama pecadu nixĩ i ngẽma. Natũrũ ngẽma ixãmẽxgũxũ rũ ixãtegũxũ rũ tá nayexera i norũ guxchaxũgũ i ñoma i naãnewa, rũ ngẽma nixĩ i tama chanaxwẽxexũ na nũxũ nangupetũxũ. ²⁹ Pa Chaueneẽgũx, pemaã nũxũ chixu rũ tama muxũ i ngunexũ tũxũ nangẽxma na naxũxũcẽx i Tupanaãrũ puracũ. Rũ ngẽmacẽx ya yĩxema ixãmẽxgũxe rũ name nixĩ i meã tanaxũgũ i Tupanaãrũ puracũ ñoma tangemẽxgũxũrũũ. ³⁰ Rũ yĩxema ngexwaca yutanũgũxe rũ yixema peta ũgũxe rũ yixema itaxegũxe, rũ tama name i ngẽmacẽx Tupanaãrũ puracũ na ítangẽxgũxũ. ³¹ Rũ yĩxema tũxũ nangẽxmaxẽ i tũmaãrũ ngẽmaxũgũ i ñoma i naãnewa, rũ tama name i ngẽmacẽx Tupanaãrũ puracũ na ítangẽxgũxũ. Erũ ñoma i naãne i ñuxma nũxũ idauxũ rũ paxa tá nagux. ³² Rũ tama chanaxwẽxe na tacũcẽx pexoegaãẽgũxũ. Rũ ngẽxguma wũxi i yatũ ngemẽxgu, rũ Tupanaãrũ puracũgu narũxĩnũ rũ nagu narũxĩnũ na ñuxãcũ Tupanaãrũ ngũchaũ naxũxũ. ³³⁻³⁴ Natũrũ ngẽxguma naxãmẽxgu ya wũxi ya yatũ, rũ ñoma i naãneãrũ ngẽmaxũgu narũxĩnũ rũ nagu narũxĩnũ na ñuxãcũ namẽxũ

nataãẽxẽẽxũ. Rũ ngẽmaãcũ muxũgu narũxĩnũ. Rũ ngẽxgumarũũ ta nixĩ i ngexũgũ. Rũ ngẽma ngexũ i ngetexũ rũ Tupanaãrũ puracũgu narũxĩnũ, erũ marũ Tupanana nũgũ naxã rũ guxũ i naxũnemaã rũ naãẽmaã naxcẽx namaxũ. Natũrũ ngẽma ngexũ i ãtexũ rũ ñoma i naãneãrũ ngẽmaxũgu narũxĩnũ, rũ nagu narũxĩnũ na ñuxãcũ natexũ nataãẽxẽẽxũ.

³⁵ Rũ perũ mexũcẽx nixĩ i pemaã nũxũ chixuxũ i ngẽma, rũ tama pexna na chanachuxuxũcẽx nixĩ. Natũrũ ngẽma ñacharũgũ na meã pemaxẽxũcẽx rũ aixcũma penaxũxũcẽx i tórũ Coriarũ puracũ.

³⁶ Rũ ngẽxguma texé nagu rũxĩnũgu na tũmaxãcũ rũ marũ na napaxũ, rũ tũmacẽx namexgu na naxãtexũ, rũ marũ name i ngĩxũ taxũte ega aixcũma tũmacẽx namexgu. Rũ ngẽma na naxãtexũ i tũmaxãcũ rũ tama pecadu nixĩ.

³⁷ Natũrũ ngẽxguma wũxi i yatũ nũxũ nangẽxmagu i norũ pacũ rũ tama nanaxwèxegu na ngĩxũ naxũtexũ, rũ ngẽma rũ ta marũ name. Erũ naxmẽxwa ingẽxma rũ taxucẽxma texé tanachixewe na ngĩxũ naxũtexũcẽx.

³⁸ Rũ ngẽmawa nũxũ tadau rũ ngẽma yatũ i naxãcũ ngĩxũ ùtexũ rũ mexũ naxũ. Rũ ngẽma yatũ i tama naxãcũ ngĩxũ ùtexũ rũ yexeraxũ i mexũ naxũ.

³⁹ Rũ wũxi i nge i ãtecũ rũ ngĩtemẽxẽwa ingẽxma i ngẽxguma namaũxgu ya ngĩte. Natũrũ ngẽxguma nayuxgu ya ngĩte, rũ marũ name ega to i yatũ i ngĩma ngĩxũ ngúchaũxũmaã naxãtegu. Natũrũ inaxwèxe na wũxi ya yatũ ya yaxõcũmaã naxãtexũ.

⁴⁰ Natũrũ chauxcẽx rũ yexeraãcũ chi itaãẽ i ngẽxguma chi tãũ chima wena naxãtegu. Rũ ngẽma ore rũ choxrũtama nixĩ, natũrũ nagu charũxĩnũ rũ Tupanaãẽ i Ûũnexũãrũ ñnũ ta nixĩ.

8

Tupananetachicünèxāgūna naxuaxŭgūxŭ ga ōnachiga

¹ Ņuxma rū tá pemaā nūxŭ chixu i nachiga i ngēma ōnagŭ i ngēma duŭxŭgŭ i tama Ngechuchuaxŭ yaxōgŭxŭ norŭ tupananetachicünèxāgūna uaxŭgŭxŭ. Rŭ aixcūma nixī i wŭxichigŭ i yixema i meāma nūxŭ icuáxŭ i ngēmachiga. Natŭrŭ ngēma nūxŭ na icuáxŭgagu rū űuxguacŭ rū yigŭ namaā ticuèxŭxŭ. Natŭrŭ ngēma na yigŭ ingechaŭxŭ rū tŭxŭ narŭngŭxēē na yexeraācŭ meā yaxōgŭchigŭxŭ. ² Rŭ ngēxguma chi texé nagu rūxīnŭgu na tacŭxŭ tacuáxŭ, rū name nixī i nŭxna tacuèxāchi na ngēxguma rū ta tama aixcūma nūxŭ tacuáxŭ i guxŭma i ngēma cuèx i aixcūma ixīxŭ. ³ Natŭrŭ ngēxguma texé aixcūma Tupanaxŭ ngechaŭgu, rū Tupana rū tŭxŭ nacuèx ya yíxema. ⁴ Rŭ ngēma na nangōxŭ i ngēma ōnagŭ i tupananetachicünèxāgūna naxuaxŭgŭxŭ i duŭxŭgŭ, rū meāma nūxŭ tacuèx na taxuwama namexŭ i ngēma tupananetachicünèxāgŭ erŭ tama aixcūma Tupanaxŭchi nixīgŭ. Erŭ wŭxixicatama nixī ya aixcūma Tupana ixīcŭ, rū nataxuma ya nāī. ⁵ Rŭ woo duŭxŭgŭ nagu narŭxīnŭe rū nangexma i muxŭma i tupanagŭ i űoma i naanewa rū dauxŭgŭxŭ i naanewa, natŭrŭ taxcèx rū tama ngemaācŭ nixī. ⁶ Erŭ yixema nūxŭ tacuèx na wŭxitama yixīxŭ ya Tupana ya Tanatŭ ixīcŭ. Rŭ nŭma ya Tanatŭ nixī i naxŭāxŭ i guxŭma i tacŭ i ngēxmaxŭ, rū naxcèx nixī i imaxèxŭ i yixemax. Rŭ ngēxgumarŭ ta nangēxma i wŭxitama ya tŭrŭ Cori ya Ngechuchu

ya Cristu. Rū yimagagu nixī na nangēxmaxū i guxūma, rū yimagagu nixī i tūxū nangēxmaxū i maxū. ⁷ Natūrū tama guxūma i yaxōgūxū nūxū nacuēx na nangēxmaxū ya wūxitama ya Tupana rū wūxitama ya tórū Cori. Rū űuxre i nūmagū ga űpa rū nūxū nayapue na nūxū yaxōgūāxū i ngēma tupananchicūnēxāgū, rū űuxma rū ta tama aixcūma nūxū nacuēxgū i ngēma mexū i Tupana nūxū naxwēxexū. Rū ngēmacēx nixī i űuxma i nagu naxīnūēxū na chixexū naxūgūxū i ngēxguma nangōxgūāgu i ngēma naxūnamachi i togū i duūxūgū norū tupananchicūnēxāgūna uaxūgūxū na nūxū namaā yacuēxūūgūxūcēx. ⁸ Rū yixema nūxū tacuēx na tama űacū rū namachi na ingōxūgagu yīxū na Tupana tūxū dexū. Rū tāūtāma yexera time i napēxewa ega nangōxgūgu i ngēma namachi. Rū tāūtāma yexera tichixe i napēxewa ega tama nangōxgūgu. ⁹ Natūrū i pema i nūxū na pecuāxū na tama pecadu yīxū na nangōxū i ngēma namachi, űrū pexuāēgū erū ngūrūāchi ngēma na pengōxūgagu chixexūgu tá penayixēē i ngēma peeneēgū i tauta aixcūma meā nūxū cuēxgūxū na űacū yīxū i Tupana nūxū naxwēxexū! ¹⁰ Erū cuma na meā Tupanaxū cucuāxū, rū ngēxguma chi cunangōxgu i ngēma namachi i ngextá tupananchicūnēxāgūxū íyacuēxūūgūxūwa, rū ngūrūāchi wūxi i cueneē i tauta meā Tupanaxū cuāxū tá cuxū nadau. Rū ngūrūāchi nūma rū tá ta nanangōx i ngēma namachi woo naāēwa nagu naxīnūgu na wūxi i chixexū yīxū na nangōxū i ngēma namachi. ¹¹ Rū ngēmaācū i cuma na meā Tupanaxū cucuāxū, rū

tá icuyanatauxêê i ngêma cueneê i Cristu naxcêx yuxŭ i tauta meã Tupanaxŭ cuáxŭ. ¹² Rŭ ngêmacêx i ngêxguma chixexŭgu cunanguxêêxgu i ngêma cueneê i tauta meã Tupanaxŭ cuáxŭ, rŭ Cristumaã rŭ ta chixexŭ cuxŭ. ¹³ Rŭ ngêmacêx i ngêxguma ngêma namachi i changôxŭgagu chixexŭgu chananguxêêxgu i chaueneê, rŭ narŭmemaê nixŭ i noxtacŭma taguma namachi changôx na tama pecadugu chananguxêêxŭcêx i ngêma chaueneê.

9

Yíxema Cristu tŭxŭ muxê na nŭxŭ tapuracŭxŭcêx, rŭ tŭxna naxŭ i tŭmaãrŭ natanŭ

¹ Rŭ pemaã nŭxŭ chixu rŭ tórŭ Coritama nixŭ ya choxŭ yaxucŭ rŭ choxŭ mucŭ na norŭ puracŭ chaxŭxŭcêx, rŭ ngêmacêx taxuŭma i duŭxŭgŭmêxêwa changêxma i ñuxmax. Rŭ chomatama chauxetŭmaã tórŭ Cori ya Ngechuchuxŭ chadau, rŭ ngêma puracŭ i nŭxŭ chaxŭxŭgagu nixŭ i peyaxôgŭxŭ i pemax. ² Rŭ woo togŭ i duŭxŭgŭ tama choxŭ cuêxgŭchaŭgu na tórŭ Cori choxŭ muxŭ, natŭrŭ i pema rŭ meãma nŭxŭ pecuêx na nŭma yŭxŭ ga choxŭ namuxŭ. Yerŭ chauxŭtawa nixŭ ga tórŭ Coriaxŭ peyaxôgŭxŭ, rŭ ngêmawa nŭxŭ pecuêx na aixcŭma yŭxŭ na nŭma choxŭ namuxŭ. ³⁻⁴ Rŭ ñaã nixŭ i chorŭ dexta i namaã chanangãxŭxŭ i ngêma duŭxŭgŭ i chauchiga idexagŭxŭ:

“¿Éxna tama name na duŭxŭgŭ choxna naxãxŭ i chorŭ ôna rŭ chorŭ axexŭ naxcêx i chorŭ puracŭ? ⁵ ¿Éxna tama inamexŭ ta na wŭxi i ngexŭ i yaxôxŭmaã na chaxãmaxŭ na chayagaxŭcêx

ngëxgumarüü na naxãmaxü i Pedru, rü naëneëgü ya törü Cori, rü ngëma togü i yatügü i Tupana imugüxü? ⁶ ¿Rü êxna pema nagu perüxîñüëgu rü choma rü Bernabéxicatama i tama namexü na toxü perüngüxëëgüxü ngëma togü i orearü uruügüxü na perüngüxëëgüxürüü? ⁷ ¿Tacü rü duüxü i churawawa üxü i nügüxütama naxütanüxü i norü ôna? ¿Rü tacü rü duüxü i orix itoxü i tama namüxü i norü o? ¿Rü tacü rü duüxü i carnerugüna dauxü i tama nagünenixü ne ixaxüxü?” Ngëma ñacharügü nüxü i ngëma duüxügü i chauchiga idexagüxü. ⁸ ¿Rü ñuxma rü tãütáma nagu perüxîñüë na chorü orexicatama yîxü i ñaã nüxü chixuxü! Erü Tupanaärü ore ga Moïché ümatüxüwa rü ta ngëma ñanagürü. ⁹ Erü ngëma ore rü ñanagürü:

“¿Rü ngëma woca i aruchuarü putëxewa puracüxü, rü tãütáma cunawëxnagu na tama yima aruchuwa nachibüxüçèx!”
 ñanagürü i ngëma ore. Rü nüxü tacuëx na tama wocagügu naxîñüxü ga Tupana ga yexguma yema ñaxgu. ¹⁰ Natürü pemaã nüxü chixu rü tagu nixî ga naxîñüxü ga yexguma yema ñaxgu ga Tupana. Rü tachiga nixî ga naxümatüxü ga yema ore. Erü yíxema aruchunecü úxe rü yíxema norü oarü puxwa puracüxe, rü ngëxguma tapuracüeyane rü tanaxwëxegü na ítananguxëëgüxü i ngëma norü o i tüxna üxü. ¹¹ Rü toma rü wüxi ya nanetüchire ya itatoxünerüü tixîgü ga yexguma pemaã nüxü tixuxgu ga Tupanaärü ore. ¿Rü ñuxma rü tama êxna i pexcëx namexü na toxna penaxãxü i tacü i toxü taxuxü? ¹² Rü ngëxguma ngëma togü i orearü uruügü petanüwa nayauxgügu i ngëma nüxü taxuxü, rü maneca toma rü yexera name nixî

i petanüwa tanayaxu i ngẽma toxũ taxuxũ. Natürü i toma rü tama ngẽmaãcü tanaxü. Erü toma rü guxũ i guxchaxũmaã taporae na tama pexũ tanaguxchaxẽxũcèx na Cristuaxũ peyaxõgũxũ.

¹³ Pema nüxũ pecuèx rü guxũma i duũxũgü i tupauca ya taxũnewa puracüexũ, rü ngẽma õna ya yima tupaucawa ngẽxmaxũtama nangõxgü. Rü ngẽma duũxũgü i tupaucagu Tupanacèx naxũnagü dèixũ, rü nanade i ñuxre i ngẽma namachi norü ngõxruũ. ¹⁴ Rü ngẽxgumarũũ ta ya yíxema nüxũ ixugüxe i ore i tüxũ maxẽxẽẽxũ, rü tórü Cori nüxũ nixu rü name nixĩ i tanayauxtanü i ngema tümaarü puracü.. ¹⁵ Natürü i choma rü taguma ngẽmaãcü chanaxü. Rü ñuxma na pexcèx chanaxümatüxũ i ñaã popera, rü tama tacü choxna pexãxũcèx nixĩ. Erü ngẽma na taguma texéxũtawa tacüçèx íchaçaxũ, rü wüxi i chorü taãe nixĩ. Rü narümemaẽ chierü nixĩ na chayuxũ naxüpa na texé choxna nayaxuxũ i ñaã taãe i choxũ ngẽxmaxũ. ¹⁶ Rü ñuxma na nüxũ chixuxũ i ngẽma ore i tüxũ maxẽxẽẽxũ, rü taguma ngẽmacèx chaugü chicuèxũũ. Erü woetama ngẽma nixĩ i chorü puracü ga Tupana choxna ãxũ, rü ngẽmacèx taxucürüwama chanangexrü. Erü poraãcü chi chachixexũgu i ngẽxguma tãũ chima nüxũ chixuxgu. ¹⁷ Rü ngẽxguma chi chaugagu chitama chanaxüxgu i ngẽma puracü, rü nagu chi charüxĩnü na choxũ naxãtanüxũ. Natürü ngẽxguma Tupana choxũ muxũãcüma chanaxüxgu, rü chanaxüama erü woetama ngẽma nixĩ i chorü puracü ga Tupana choxna ãxũ.

¹⁸ ¿Rü ñuxma rü tacü tá nixĩ i chorü natanü naxcèx i ngẽma puracü i chaxüxũ? Rü dücax,

rũ chorũ natanũ nixĩ i ngẽma taãẽ i chayaxuxũ i ngẽxguma ngetanũãcũma nũxũ chixuxgu i ngẽma ore i tũxũ maxẽẽẽxũ. Rũ ngẽmaãcũ woo Tupanapẽxewa name na petanũwa chanayaxuxũ i chorũ natanũ na ngẽmamaã chamaxũxũcẽx, natürũ taguma texena naxcẽx chaca.. ¹⁹ Rũ woo taxũxemẽxẽwa changẽxma i chomax, natürũ guxãmẽxẽwa chaugũ changẽxmaxẽẽ, na ngẽmaãcũ yexeraãcũ muxũma i duũxũgũ üxũ charüngũxẽẽxũcẽx na Cristuaxũ yaxõgũãxũcẽx. ²⁰ Rũ ngẽxguma chautanũxũ i Yudiũgũtanũwa changẽxmagu, rũ namaã chaugũ chawũxiguẽẽ na ngẽmaãcũ nũxũ charüngũxẽẽxũcẽx na Cristuaxũ yaxõgũãxũcẽx. Rũ woo tama yema Moĩché ümatũxũ ga mugütũũwa changẽxmagu, natürũ chayanguxẽẽãma i ngẽma mugũ na ngẽmaãcũ Cristuxũtawa chanagagũxũ i ngẽma duũxũgũ i ñuxma rũ ta nagu ãxũ i ngẽma mugũ ga Moĩché ümatũxũ. ²¹ Rũ ngẽxguma natanũwa changẽxmagu i ngẽma duũxũgũ i tama Yudiũgũ ixĩgũxũ, rũ ngẽma duũxũgũmaã chaugũ chawũxiguxẽẽ na ngẽmaãcũ nũxũ charüngũxẽẽxũcẽx na Cristuaxũ yaxõgũãxũcẽx. Natürũ taguma íchanangẽx i Tupanaãrũ mugũ erũ guxũguma Cristuarũ mugütũũwa changẽxma. ²² Rũ ngẽxguma natanũwa changẽxmagu i ngẽma duũxũgũ i tama poraãcũ Cristuchigaxũ cuẽxgũxũ, rũ choma rũ ta ngẽma duũxũgũmaã chaugũ chawũxiguxẽẽ, na ngẽmaãcũ nũxũ charüngũxẽẽxũcẽx na Cristuaxũ yaxõgũãxũcẽx. Rũ ngẽmaãcũ guxũma i duũxũgũrũũ chaugũ chixĩxẽẽ, rũ nagũxũraũãcũma naxcẽx chadau na ngẽmaãcũ

dūxwa Tupanaxūtawa chanagagūxūcèx i ñuxre i nūmagū. ²³ Rū ngēmaācū nixī i chapuracūxū na guxūwama nanguxūcèx i ngēma ore i tūxū maxēxēxū. Erū chanaxwèxe na choma rū ta choxū nangēxmaxū i ngēma maxū i taguma gūxū, naxrū i guxūma i ngēma duūxūgū i nūxū yaxōgūxū. ²⁴ Pema rū meāma nūxū pecuèx i wūxi i inūca i nawa iñaāchixū rū muxūma inaxūāchi, natūrū wūxixicatama nixī i ngēma nūxīra ínguxū rū nayaxuxū i norū āmare. Rū name nixī i pegūna pedau na Tupana pexna naxāxūcèx i ngēma perū āmare. ²⁵ Guxūma i ngēma duūxūgū i nūgū ngúexēxū naxcèx i wūxi i inūca na toguēgūxū naporamaexūcèx, rū meā nūgūna nadaugū na ngēmaācū nayauxgūāxūcèx i norū āmare i paxaāchiruū ixīxū. Natūrū yixema na yaxōgūxū rū yigūna tadaugū na meā naxūgūxūcèx rū meā imaxēxūcèx na nayauxgūxūcèx i tórū āmare i taguma gūxū. ²⁶ Rū ngēmacèx i choma rū tama ñoma chauēchitamare chiñaxūrū chixī, rū tama ñoma tacū i nūgū dèixū i ngūrūanegumare idagūxūrū chixī. ²⁷ Rū ngēmacèx meā chaugūmaā ichacuèx na taxuūma i chaxuneārū ngúchaū chaxūxūcèx. Erū tama chanaxwèxe i mexūmaā togūxū changuxēēchirēxācūma chixexū chaxū rū ngemagagu tama chanayaxu i chorū āmare.

10

Nayaxucuxēgū na tama nūxū yacuèxūūgūxūcèx i tupanānetachicūnèxāgū

¹ Pa Chaueneēgūx, chanaxwèxe i nūxna pecuèxāchie ga tacū nūxū na ngupetūxū ga yema nuxcūmaūgūxū ga tórū oxigū ga Moīchéwe

rūxīxŭ. Rū pema nūxŭ pecuèx rū yexguma nawe naxīxgu rū wūxi ga caixanexŭ napēxegu nixŭ rū nayadūxū. Rū guxŭma ga yema duŭxŭgŭ rū wūxigu Moīchémaā natūŭgu nixīxŭtanū. Rū yexgumarŭŭ ta Moīchémaā nawa nichoŭ ga yema Taxtŭ ga Dauchiūxŭ. ² Rū guxŭma ga yema duŭxŭgŭ rū yexguma wūxigu Moīchémaā yema caixanexŭpechitatūŭgu yaxīxŭtanūgu rū yema Taxtŭ ga Dauchiūxŭwa yachoŭgu, rū yemaācŭ nŭgŭ nangoxēēgŭ na Moīchéweama naxīxŭ. ³ Rū yexgumarŭŭ ta ga guxŭma ga yema duŭxŭgŭ nanangōxgŭ ga yema pāŭ ga daxŭwa rūyixŭ. ⁴ Rū guxŭma ga yema duŭxŭgŭ nayaxaxgŭ ga yema dexá ga Cristu nūxna āxŭ. Yerŭ Cristu rū yema duŭxŭgŭxŭ ínixŭmŭcŭ ga yema ínaxīxŭwa, rū nūxna nanaxā ga yema dexá ga yaxaxgŭxŭ. ⁵ Natŭrŭ narŭmumaē ga yema duŭxŭgŭ ga tama Tupanaārŭ ngŭchaŭ ŭgŭxŭ. Rū yemacèx ga yema duŭxŭgŭ rū yexma nayue rū yéma nawogŭ ga naxŭnegŭ ga dauxchitawa ga taxúema íxāpataxŭwa. ⁶ Rū guxŭma ga yema nangupetŭ na tórŭ cuèxruŭ yīxŭcè rū tama tórŭ oxigŭrŭxŭ chixexŭcèxama idaugŭxŭcèx. ⁷ Rū ngēmacèx tama name i nūxŭ picuèxŭŭgŭ i tacŭ rū tupananetachicŭnèxāgŭ, yexgumarŭŭ ga ñuxre ga nūmagŭ naxŭgŭxŭrŭŭ. Erŭ Tupanaārŭ ore i ŭmatŭxŭwa rū tórŭ oxigŭchigaxŭ nixu rū ñanagŭrŭ:

“Rū duŭxŭgŭ ínarŭtogŭ na nachibŭexŭcèx rū na naxaxegŭxŭcèx, rū ngēmawena rū inachigŭ na íyayŭxexŭcèx”,

ñanagŭrŭ i ngēma ore. ⁸ Rū tama name i yixema rū naī i ngemaā itape yexgumarŭŭ ga ñuxre ga

nūmagū naxūgūxūrū. Rū yemacēx wūxitama ga ngunexūgu rū nayue ga 23,000. ⁹ Rū tama name i nūxū taxū ya tórū Cori na ñuxācū yaxna tamaā naxīnūxū yexgumarū ga ñuxre ga nūmagū naxūgūxūrū. Rū yemacēx nixī ga yema duūxūgūxū nangōxcuxū ga āxtapegū rū nayuexū. ¹⁰ Rū tama name i chixexū Tupanamaā pixugū yema ñuxre ga nuxcūmaūgūxū ga tórū oxigūrū. Rū yemacēx ga Tupanaārū orearū ngeruū ga daxūcūāx rū nanadai. ¹¹ Rū guxūma ga yema nuxcūmaxūgūxū ga duūxūgūxū ngupetūxū, rū ñomaxūcū rū tórū cuēxruū nixī. Rū naxūmatū na ngēmawa nūxū icuāxūcēx na ñuxācū Tupana naxwēxexū na imaxēxū i yixema i ñomaūcū. ¹² Rū ngēmacēx ya yīxema tūgūgu rūxīnūxē na taporaxū i Tupanapēxewa, rū name nixī na meā tūgūna tadauxū na tama chixexūgu tanguxūcēx. ¹³ Rū ñuxma rū ta taguma pexcēx íangu i ngúchaxū i chixexū i taxucūrūwama namaā yaxna pexīnūexū. Rū name nixī i Tupanana perūyoū erū nūma rū aixcūma nayanguxēē i ngema tamaā inaxunetaxū rū taxūtáma nawa pexū nawogū i ngúchaxūgū i taxucūrūwama yaxna namaā pexīnūexū. Natūrū ngexguma tá ngúchaxūgū i chixexū pexcēx ínguxgu rū nūma rū tá pexū ínapoxū na tama nagu peyixūcēx. ¹⁴ Rū ngēmacēx, Pa Chaueneēgū ya Pexū Changechaūgūxex, jrū nūxū perūxoe i ngema nacūmagū i tupananetachicūnēāgūcēx naxūgūxū i ngema duūxūgū i tama yaxōgūxū! ¹⁵ Pemaā nūxū chixu i ngēma ore, erū chauxcēx rū duūxūgū i nūxū cuāxū pixīgū. Rū pema tátama nagu perūxīnūē i ngēma pemaā nūxū chixuxū. ¹⁶ Rū ngēxguma ōna i ūūnexūcēx

ingutaquëxegügu, rü yaxaxgügu ya yima binu ya üüncü rü moxë naxcëx ixägügu, rü ngëmaäcü yigü tangoxëë na Cristu ya taxcëx nagü ibacüwe rüixü. Rü ngëxguma nangöxgügu i ngëma pãu i ibücuxü, rü ngëmaäcü yigü tangoxëë na Cristu ya taxcëx naxüne ixäcüwe rüixü. ¹⁷ Rü woo na imuxü i yixema, natürü wüxitama i pãu tangöxgü. Rü ngëmaäcü nixi i wüxitama ixigüxü erü wüxiwetama tarüxi. ¹⁸ ;Rü dücax i ngëma Yudíugü i nangöxgüxü i ngëma naxünamachi i Tupanacëx nadëixü! Rü ngëxguma wüxigu nügümaã nangöxgüägu, rü guxüma i ngëma nangöxgüxü rü ngëmaäcü nügü nangoxëë na wüxigu Tupanawe naxüxü. ¹⁹ Rü ñuxma na ngëma ñachaxü, rü tama chanaxwëxe i nagu perüxĩnüë na naxüünexü i ngëma namachi i ngëma duüxügü i tama yaxögüxü norü tupananetachicünëxäcëx dëixü. Rü tama chanaxwëxe i nagu perüxĩnüë na tacüwa namexü i ngëma norü tupananetachicünëxägü, erü nangearü maxüäx. ²⁰ Natürü pemaã nüxü chixu rü ngëxguma ngëma duüxügü i tama Tupanaxü cuëxgüxü, norü tupananetachicünëxäcëx nadaiägu i tacü rü naxüna, rü tama Tupanacëx nixi i nadaiäxü, natürü ngoxogücëx nixi i nadaiäxü. Rü tama chanaxwëxe i ngoxogütanüxüxü pegü pixigüxëë. ²¹ Rü pema na peyaxaxgüxü ya yima binu ya törü Corixü namaã picuëxüügücü rü taxucürüwama namaã pexämücü i ngëma duüxügü i Chatanáwe rüixü. Rü pema na törü Coriarü mechawa penangöxü i ngëma ñna i nüxü namaã picuëxüügüxü rü taxucürüwama

ngẽma duũxũgũ i Chatanáwe rüxĩxũârũ mechawa peyachibüe. ²² ¿Rü ñuxũ ñapegũxũ i ñuxmax? ¿Éxna penanuxẽẽchaũ ya tórũ Cori? ¿Éxna pexcèx rü nüxũ tarüporamaẽgũ i yixemax?

Name nixĩ i taeneẽarũ mexüç èx tadaugũ rü tama i tóxrütama

²³ Pema rü ñaperügügũ:

“Marũ name na tanaxũxũ i tacũ i tanaxwèxegũxũ”, ñaperügügũ. Rü aixcũma nixĩ i ngẽma, natürũ tama tüxũ name i guxũma i ngẽma ixũxchaũxũ. Rü ngẽmaãcũ Cristu tüxũ ínanguxũxẽẽ na naxũxücèx i ngẽma inaxwèxexũ, natürũ tama guxũma i ngẽma ixũxũ tüxũ narüngũxẽẽ na yexeraãcũ meã yaxõgũamachigũxücèx. ²⁴ Rü tama name nixĩ i tóxrütama mexüçèx tadaugũ, natürũ name nixĩ i togüarũ mexüçèx tadaugũ. ²⁵ Rü marũ name i penangõx i nagũxũraũxũ i namachi i namaã nataxegũxũ, natürũ taxucèxma tüxcüũ naxcèx ípeca ngoxi marũ tupananetagũxũ namaã yacuèxũxũgũxũ i namachi yixĩ. ²⁶ Erũ ñoma i naãne rü guxũma i nawa ngẽxmaxũ, rü tórũ Cori ya Tupanaarũ nixĩ. ²⁷ Rü ngẽxguma chi wüxi i duũxũ i tama yaxõxũ pexna uxgu na naxũtawa peyachibüexücèx, rü chi ngẽma pexĩxgu, rü marũ name i penangõx i guxũma i õna i pepèxegu yaxũxũchixũ. Rü taxucèxma tüxcüũ naxcèx pexoegaãẽ rü nüxna peca na ngextá ne naxũxũ i ngẽma namachi i pemaã nangõxũ. ²⁸ Natürũ ngürüãchi wüxie tá pemaã nüxũ tixu rü ñatarügũ:

“Ñãã namachi rü tupananetachicünèxãcèx yamèxgũxũ i naxũnawa ne üxũ nixĩ”, ñatarügũ.

Rū ngēxguma i pema rū tama name na penangõxŭ i ngēma namachi na tama chixexŭgu tŭxŭ penguxēxŭcèx ya yíxema pemaã nŭxŭ ixuxe, rū tama ngēmacèx taxoegaãēxŭcèx i tŭmax. ²⁹ Rū tama pechiga nixĩ i chidexaxŭ i ngēxguma:

“Na tama taxoegaãēxŭcèx”, ñachagu. Natürü yíxema pemaã nŭxŭ ixuxechiga nixĩ i chidexaxŭ. Natürü bexmana ngürüãchi wŭxi i yaxõxŭ tá cuxna naca rū ñanagürü tá cuxŭ:

“¿Tŭxcŭŭ i togŭ naxcèx oegaãēxŭgagu choxna cunachuxu na tama chanaxŭxŭ i tacŭ i chanaxwèxexŭ? ³⁰ Rū ngēxguma chi Tupanana moxē chaxãxgu naxcèx i ngēma õna i changõxŭ, ¿rŭ tŭxcŭŭ i ngēma õnacèx choxŭ quixu?” ñanagürü. ³¹ Dŭcèx, pemaã nŭxŭ chixu rū name nixĩ i guxŭma i ngēma pexŭxŭmaã Tupanaxŭ picuèxŭxŭgŭ. Rū ngexguma tacŭ pengoxgŭgu rū exna tacŭ pixaxgŭgu rū ěxna tacŭ i to pexŭgŭgu, rū name nixĩ i ngēmamaã Tupanaxŭ picuèxŭxŭgŭ. ³² Rū tama name i penaxŭ i tacŭ i togŭxŭ chixexŭgu yixēēxŭ, rū woo Yudíugŭ yixíugŭgu rū ěxna tama Yudíugŭ yixíugŭgu, rū ěxna yaxõgŭxŭ yixíugŭgu. ³³ Rū choma rū guxŭwama guxŭxŭma chataãēxēēchaxŭ. Rū ngemacèx tama chanaxŭ i ngema chomatama namaã chataãxēxŭ, natürü chanaxŭ i ngema togŭ namaã taãxēxŭ na ngemaãcŭ nŭmagŭ rū ta nuxŭ nangúchaxŭ na yaxõgŭãxŭ rū nayauxgŭãxŭ i maxŭ i taguma gŭxŭ.

11

¹ Rū name nixĩ i nagu pexĩ i chaucüma ngēxgumarŭŭ i choma na Cristucümagu

chixūxūrū.

Name nixī i ngexūgū rū mexū i nacūmagu naxī

² Pa Chaueneēgūx, pemaā chataāē erū guxūguma chaugu perūxīnūē rū nagu pexī ga yema nguxēētae ga pexū changūexēēxū. ³ Natūrū chanaxwēxe i nūxū pecuēx na Cristu rū wūxichigū i yatūeru na yīxū. Rū yatūxūgū rū naxmēxēru nixīgū ngēxgumarū ya Tupana rū Cristueru na yīxū. ⁴ Rū ngēmacēx i ngēxguma wūxi ya yatū ngutaquēxewa yumūxēgu rū ēxna Tupanaārū orexū yaxuxgu, rū tama ínangēxūchipatēxegu, rū ngēma rū wūxi i chixexū nixī i Cristupēxewa naxūxū. ⁵ Natūrū ngēxguma chi wūxi i ngecū ngutaquēxewa yumūxēgu rū ēxna Tupanaārū orexū yaxuxgu, rū chi tama ngīgū natūerugu, rū ngēma rū wūxi i chixexū nixī i ngītepēxewa naxūxū. Rū ñoma ngīgū yadūeruxūrū iyixī. ⁶ Erū ngēxguma chi tama ngīgū natūeruchaūgu, rū narūmemaē nixī i noxtacūma ngīgū ibēixeru. Natūrū ngēxguma chi wūxi i ngīrū āne yixīgu i ngēma na ngīgū nabēixeruxū rū ēxna ngīgū yadūeruxū, rū narūmemaē nixī i ngīgū itūeru. ⁷ Natūrū yatūgū rū tama name na nūgū natūerugūxū. Yerū ga Tupana rū nūgūraūācū nanaxū ga yatū rū Tupanachipeta nixī. Rū yima yatūwa nixī i nangóxū na ñuxācū namexēchixū ya Tupana. Rū ngēma ngecūwa nixī i nangóxū na ñuxācū namexū ya yatū. ⁸ Yerū yexguma noxri Tupana naxūxgu ga yatū, rū tama ngecūwa nixī ga naxūāxū. Rū ngīma waxi nixī ga yatūwa ngīxū naxūxū. ⁹ Rū yatūcēx nixī ga Tupana ngīxū ūxū ga ngecū, rū tama ngecūcēx nixī ga Tupana naxūxū

ga yatü. ¹⁰ Rü ngēmacèx name nixĩ i ngĩgü itüeru na duũxügüpēxewa rü Tupanaärü orearü ngeruügü i daxüçüâxgüpēxewa nangóxüçèx na ngĩtemēxēwa nangēxmaxü. ¹¹ Natürü Tupanapēxewa rü taxuüma nixĩ ya yatü ega natauxgu i ngecü. Rü ngēxgumarüü ta i ngecü rü taxuüma iyixĩ ega natauxguma ya yatü. ¹² Yerü yexguma noxri Tupana ngĩxü üxgu ga ngecü, rü yatüwa nixĩ ga ngĩxü naxüxü. Rü ngēxgumarüü ta ya yatü rü ngecüwa nixĩ i nabuxü. Natürü Tupana nixĩ ya naxücü i guxüma i duũxügü. ¹³ Rü pematama tá penangugü rü ngoxi name na wüxi i ngecü rü tama ngĩgü natüeruäcüma nayumüxēxü. ¹⁴ Rü woetama tórü bucüma nixĩ i nüxü na icuáxü na wüxi i âne yiixü na nügü namēxyaexēxü i wüxi i yatüxü. ¹⁵ Natürü ngeçüçèx rü wüxi i mexēchixü nixĩ na namēxyaexü. Erü Tupana rü ngĩxna nanaxã i ngĩyae na ngēmamaã ngĩgü natüeruxüçèx. ¹⁶ Natürü ngēxguma chi texé ngēmachiga tügü choxügagügu, rü name nixĩ i nüxü tacuèx na ngēmatama yiixü i tacüma rü nacüma i guxüma i yaxôgüxü i guxünema ya tupaucagüwa.

Duũxügü rü chixri namaã inacüèxgü ga Coriarü ãna i üünexü

¹⁷ Rü ñuxma i ñaã popera i pexcèx chaxümatüxüwa rü pemaã nüxü chixu rü nangēxma i wüxi i pecüma i chixexü i tama namaã chataãēxü. Erü chauxcèx i ngēma perü ngutaquēxegü rü pexü nachixexēē, rü tama aixcüma perü meruügü nixĩ. ¹⁸ Erü duũxügü chomaã nüxü nixugügü rü ngēxguma tórü Coricèx pengutaquēxegüüxgu rü pegü pitoye.

Rū ngāxūgu chayaxō na aixcūma yīxū i ngēma nūxū yaxugūgūxū. ¹⁹ Choma rū nūxū chachuēx na aixcūma woe tātama yīxū i pegū pitoyexū na ngēmawa nūxū icuáxūcēx na texégū tiīxū ya yīxema aixcūma Cristuarū duūxūgū ixīgūxe. ²⁰ Rū ngēma pegū na pitoyexūgagu nixī na tama aixcūma tórū Corixū picuēxūūgūācūma yīxū i penangōxū i tórū Coriarū ōna i Üünexū i ngēxguma pengutaquēxegūūxgu. ²¹ Erū ngēxguma penangōxgu i ngēma ōna i Üünexū rū wūxichigū rū peñuxāēgū na pexira na penayaxuxūcēx i ngēma ōna. Rū yoxni i ngēma togū rū ngēxma nataiyae, rū togū rū nayaxaxgū ya binu ñuxmata nangāxē. ²² ¿Éxna pengechiūgū ecēx tama ngema pechibüexū rū pexaxegūxū? ¿Tūxcūū nūxū pexoe i ngēma togū i yaxōgūxū rū penaxāneēxēē i ngēma yaxōgūxū i ngearū ngēmaxūāxgūxū? ¿Rū tacūxū tá pemaā chixu i ñuxmax? ¿Pexcēx rū tá pemaā chataāēxū? Dūcēx, pemaā nūxū chixu rū tama pemaā chataāē naxcēx i ngēma pexūgūxū.

Tórū Coriarū ōna i üünexūchiga

²³ Rū ngema nguxēētae i pemaā nūxū chixuxū rū tórū Corixūtawatama chanayaxu. Rū yexguma tórū Cori ga Ngechuchuxū ínaxuaxūgu, rū yematama chūtaxūgu rū nūma rū nanayaxu ga wūxi ga pāū. ²⁴ Rū Tupanana moxē naxā, rū yemawena rū inanabūcu, rū ñanagürü:

“Ñāā nixī i chaxune i pexcēx ichaxāxūchiga. ¡Rū penangō i ñāā pāū na ngēmaācū peāēwa choxna pecuēxāchiexūcēx!” ñanagürü. ²⁵ Rū yexgumarūū

ta ga chibūwena rū Ngechuchu nanayaxu ga wūxi ga pochiyu ga binuchiūmaã ããcuxŭ, rū ñanagŭrŭ:

“Rū daa binu rū wūxi i cuèxruŭ nixĩ na ngexwacèx Tupana duŭxŭgūmaã ixunetaxŭ i maxŭ i taguma gúxŭchiga. Rū chaugŭ ya pexcèx ibacūmaã nixĩ i Tupana pexŭ nŭxŭ cuèxēēxŭ i ngēmachiga. Rū ngēxguma ñuxguacŭ daa binu pixaxgŭgu rū ñuxma choma na chanaxŭxŭrŭŭ tá penaxŭ na peãēwa choxna pecuèxãchiexŭcèx”, ñanagŭrŭ ga Ngechuchu. ²⁶ Rū guxŭguma i ngēxguma penangŭxgu i ñaã pãŭ rū peyaxaxgŭgu ya daa binu rū ngēmawa tá duŭxŭgŭxŭ nŭxŭ picuèxēē na ñuxãcŭ tŏrŭ pecaducèx nayuxŭ ga tŏrŭ Cori. Rū ngēmaãcŭ tá penaxŭ ñuxmatáta wena nataegu i nūmax.

Texegŭcèx nixĩ i tŏrŭ Coriarŭ òna i ũūnexŭ

²⁷ Natŭrŭ ngēxguma chi texe tama tŭgŭ tamexēēarŭ maxŭxãcūma nangŭxgu i Coriarŭ pãŭ i ũūnexŭ rū tayaxaxŭxgu ya yima binu ya ũūnecŭ, rū pecadu taxŭ napewa ya tŏrŭ Cori ya taxcèx yucŭ rū nagŭ ibacŭ. ²⁸ Rū ngēmacèx naxŭpa na tanangŭxŭ i ngēma pãŭ rū na tayaxaxŭxŭ ya yima binu, rū name nixĩ i wŭxichigŭ meã tūmaarŭ maxŭgu tarŭxĩnŭ ngoxi nataxuma i ŭacŭ rū chixexŭ i tūmaarŭ maxŭwa. ²⁹ Erŭ ngēxguma tama tŭgŭ tamaxēēarŭ maxŭãcūma tanangŭxgu rū tayaxaxŭxgu, rū tŭgŭtama poxcuwa taga. Erŭ tama aixcūma tayaxŏ na tŏrŭ Corichiga yixĩxŭ i ngema pãŭ rū yima binu.. ³⁰ Rū ngēmacèx nixĩ i muxŭchixe i petanŭwa rū pidaaweexŭ rū peturaexŭ, rū ñuxre i togŭ rū marŭ nayuexŭ. ³¹ Natŭrŭ ngēxguma chi tŏrŭtama maxŭgu rŭxĩnŭegu naxŭpa na nangŭxŭ

i ngēma Coriarū ōna, rū nūma rū taxucèx tūxū napoxcue. ³² Natūrū ngēxguma tórū Cori ñoma i tórū maxūwa tūxū poxcugu, rū ngēmaācū tūxū inayarūwēxāchixēē na tama yixcūra naāneārū guxgu tūxū napoxcuxūcèx wūxigu namaā i ngēma duūxūgū i tama yaxōgūxū. ³³ Rū ngēmacèx, Pa Chaueneēgūx, ngēxguma pengutaquēxegūgu na penangōxūcèx i ngēma ōna i ūūnexū, name nixī i pegū ípenanguxēē na guxāma wūxigu meā penangōxūcèx. ³⁴ Rū ngēxguma chi texé taiyèxgu, rū name nixī i tūmapatawatama tachibū na tama Tupana pexū poxcuexūcèx naxcèx na chixexū pexūexū i perū ngutaquēxegūwa. Rū ngēma to i guxchaxūgū i pexū ngēxmaxū, rū choma tá chanamexēē i ngēxguma petanūwa chaxūxgu.

12

Ngēma cuèx i Tupanaāē i Ūūnexū tūxna āxūchiga

¹ Pa Chaueneēgūx, chanaxwèxe i nūxū pecuèx na ñuxācū yīxū i ngēma cuèx rū ñuxacū na yixīxū i ngēma tauxcha i Tupanaāē i Ūūnexū tūxna āxū. Rū ngēmachiga nixī i pemaā nūxū chixuxchaūxū i ñuxmax. ² Rū pema meāma nūxū pecuèx ga yexguma tauta Cristuaxū peyaxōgūgu, rū pegū nūxna pexāgū ga tupanānetachicūnèxāgū ga tama idexaxū. ³ Rū ngēmacèx i ñuxma rū chanaxwèxe i meā nūxū pecuèx rū taxucūrūwama texe ya Tupanaāē i Ūūnexū tūmawa ngexmaxe rū chixri Ngechuchuchuga tidexa. Rū ngexgumarūxū ta rū taxucūrūwama texe ngūrūmare tūechama rū:

“Ngechuchu rū tórū Cori nixī”, ñatarūgū ega tama Tupanaāē i Ūūnexū tūxū muxgu na

ngēmaācū tidexaxūcēx. ⁴ Rū nūma ya Tupana rū duūxūgūna nanaxā i naguxūraū i tauchagū. Natūrū ngema Naāxē i Ūūnexū i nawa ne naxīxū i ngema tauchagū rū wūxitama nixī. ⁵ Nangēxma i nagúxūraūxū i Tupanaarū puracū, natūrū yima tórū Cori ya tūxna naxācū i ngema puracūgū rū wūxitama nixī. ⁶ Rū Tupanaarū pora rū nagúxūraūācū nangox. Natūrū wūxitama nixī ya yima Tanatū ya tawa gúxūraūācū nangoxēēcū i ngema norū puracū. ⁷ Rū ngema Naāē i Ūūnexū wūxixewachigū nanangoxēē i Tupanaarū pora i norū duūxūgūtanūwa na ngemaācū guxāarū ngūxēēruū yixīxūcēx. ⁸ Rū Naāē i Ūūnexū rū tūmāxena rū nanaxā i tauxcha na ucuēxū tacuāxūcēx. Rū ngēmatama Naāē i Ūūnexū rū togueāxū rū nanatauxchaxēē na nūxū tacuāxū na mea tangúxēētaexū i Tupanaarū ore. ⁹ Rū togue rū ngēmatama Naāē i Ūūnexū tūxū nanatauxchaxēē na Tupanana tarūyoexūcēx. Rū togue rū tūxna nanaxā i pora na ngēmamaā naxcēx tayataanegūxēēxūcēx i ngēma idaaweexū. ¹⁰ Rū togue rū tūxna nanaxā i pora na tanaxūxūcēx i mexūgū i Tupanaarū poramaā ūxū. Rū togue rū tūxū nanatauxchaēē na nūxū tixuxūcēx i Tupanaarū ore. Rū togue rū tūxna nanaxā i cuēx na nūxū tacuāxūcēx i tacū yīxū i ngoxogūarū ixīxū rū tacū yīxū i Tupanaāē i Ūūnexūārū ixīxū. Rū togue rū tūxna nanaxā i tauxcha na ngēma tama nūxū tacuāxū i nagawa tidexaxūcēx. Rū togue rū tūxna nanaxā i cuēx na tanangoxēēxūcēx na tacūchiga yīxū na tidexaxū ya yīxema to i nagawa idexāxe. ¹¹ Rū guxūma i ngēma rū Tupanaāē

i Üünexütama nixĩ i naxüxũ. Rü nüma nixĩ i wüxichigü i duüxüna naxããxũ i ngẽma cuèx i nüma nanaxwèxexũ na nüxna naxããxũ.

Guxãma i yaxõgüxũ rü wüxitama i naxünewa naxügü

¹² Rü duüxüxüne rü woo muxügu nixüye, natürü wüxitama i naxüne nixĩ. Rü ngexgumarüxũ ta i ngema Cristuãxũ yaxõgüxũ rü woo namu, natürü wüxitama i naxünewa naxügü. ¹³ Rü yexguma íbaiügu rü Tupanaãe i Üünexũ rü wüxitama i naxüne tüxũ nixĩgüxẽe. Rü woo Yudiügu na ixĩgüxũ, rü êxna tama Yudiügu na ixĩgüxũ, rü woo togümẽxewa ingexmagüxũ rü êxna taxúxemẽxewa ingẽxmagüxũ, natürü wüxitama i naxüne tüxũ nixĩgüxẽe i nüma i Naãe i Üünexũ i nüxicatama ixĩxũ. Rü guxãma i yixema rü marü tüxna nangu i ngẽma Naãe i Üünexũ. ¹⁴ Wüxi i naxüne rü tama naxãmenãxamare, natürü muxügu nixüye. ¹⁵ Rü ngẽxguma chi yima nacutü ñaxgu:

“Rü ñuxma na tama naxmẽx chiĩxũ, rü ngẽmacèx tama ngẽma naxünewa changẽxma”, ñaxgu, rü tama ngẽmacèx nüxũ narüxo na ngema naxünewa nangexmaxũ. ¹⁶ Rü ngẽxguma chi yima naxpaxchinü ñaxgu:

“Rü ñuxma na tama naxëtü chiĩxũ, rü ngẽmacèx tama naxünewa changẽxma”, ñaxgu, rü tama ngẽmacèx nüxũ narüxo na ngema naxünewa nangexmaxũ. ¹⁷ Rü ngẽxguma chi guxüma i naxüne rü naxëtü yixĩgu, ¿rü tacümaã chi i nüxũ naxĩnüxũ i ngema naxüne? Rü ngẽxguma chi guxüma i naxüne rü naxmachixẽ yixĩgu,

ĥrū tacūmaā chi i nūxū nawāxīxū? ¹⁸ Natürū Tupana ga naxúcū ga taxūne, rü ngexta nūma ínanaxwèxexūwa nanangexmaxēē i taeru rü tachacūügü rü taparagü. ¹⁹ Rü ngëxguma chi nataxuxgu i norū üyechigü i taxūne rü chi naxāmenèxāmare. ²⁰ Rü ngema naxūne rü woo muxūgu nixüye, natürū wūxitama i naxūne nixī. ²¹ Rü taxetü rü taxucürüwa taxmëxū ñanagürü:

“Choma rü tama chacuxwèxe”, ñanagürü. Rü ngëxgumarūū ta i taeru rü taxucürüwa tacutügüxū ñanagürü:

“Choma rü tama chapexwèxe”, ñanagürü. ²² Natürū ngëma yexeraācū āücūmaxū i taxūnewa, rü ngëma nixī i yexera nanaxwèxexū i taxūne. ²³ Rü ngëma taxūnewa yexeraācū naxcèx ixānexū, rü ngëma nixī i yexera meā ixūxchiruxū. Rü ngëma taxūnewa ngëxmaxū i tama inaxwèxexū na nangóxū, rü ngëma nixī i yexera meā idūxūxū. ²⁴ Natürū tama ngëmaācū tanaxū namaā i ngëma taxūnewa ngëxmaxū i guxāxūma iwéxū. Rü ngëmaācū Tupana nanaxū i taxūne, na yexeraācū nūxna idauxūcèx i ngëma yexera naxcèx ixānexū. ²⁵ Rü ngëmaācū Tupana nanaxū i taxūne na wūxichigü i norū üye nügügu naxīnūexūcèx rü nügü nangūxēēgūxūcèx. ²⁶ Rü ngëxguma chi wūxi i ngëma taxūnearü üye nūxū nguḡgux, rü guxūma i ngëma togü i natanūxūgü rü ta nūxū nangux. Rü ngëxguma chi wūxi i ngëma taxūnearü üye taāëxgu, rü guxūma i ngëma togü i natanūxūgü rü ta nataāëgü. ²⁷ Rü ñuxma i wūxichigü i pema rü Cristuxūnearü üye pixīgü, rü ngema naxūnewa pexügü. ²⁸ Rü ngëmacèx ya Tupana rü nanaxwae

na ñaacü nügü inanuxŭ i norü duŭxŭgü: Rŭ yixema tŭxira tŭxŭ naxunetagŭxe tixĩ ya norü puracüwa tŭxŭ namugŭxe. Rŭ tŭxŭ naxuneta ya toguegü na nüxŭ tixugŭxŭcèx i norü ore. Rŭ tŭxŭ naxuneta ya toguegü na duŭxŭgŭxŭ tangŭexèxŭcèx i norü ore, rŭ toguegü na tanaxŭgŭxŭcèx i mexŭgü i Tupanaârü poramaã taxŭgŭxŭ. Rŭ toguegü rŭ tŭxŭ nanatauxchaxèe na tanameexèxŭcèx i idaaweexŭ, rŭ toguegü na nüxŭ tarŭngŭxèegŭxŭcèx i ngema tacü nüxŭ taxuxŭ, rŭ toguegü yaxŭgŭxŭârü âexgacŭgü na tixŭgŭxŭcèx. Rŭ tŭxŭ nanatauchaxèe ya toguegü na ngẽma naga i tama nüxŭ tacuáxŭwa tidexagŭxŭcèx. ²⁹ Rŭ tama guxãma Tupana tŭxŭ imugŭxe tixŭgü, rŭ tama guxãma Tupanaârü orearü uruŭ tixŭgü. Rŭ tama guxãma norü orewa ngŭxèetaegŭxe tixŭgü, rŭ tama guxãma nüxŭ tacuèx na tanaxŭxŭ i mexŭgü i taxŭgü i Tupanaârü poramaã ŭxŭ. ³⁰ Rŭ tama guxãma nüxŭ tacuèx na tanameexèexŭ i duŭxŭgü i idaaweexŭ. Rŭ tama guxãma nüxŭ tacuèx na nawa tidexagŭxŭ i wüxi i naga i tama nüxŭ tacuáxŭ. Rŭ tama guxãma nüxŭ tacuèx na tanangoxèexŭ na tacüchiga yadexaxŭ i ngẽma duŭxŭgü i tama nüxŭ nacuáxŭ i nagawa idexaxŭ. ³¹ Rŭ name nixĩ inaxcèx pedèux na Tupana pexna naxãxŭcèx i ngẽma cuèx rŭ tauxchagü i rümemaegŭxŭ.

Yigü na ingechaŭgŭxŭchiga

Natürü i ñuxma rŭ tá pexŭ changŭexèe i tacü nixĩ i guxŭma i ngẽma pemaã nüxŭ chixuxŭârü yexera rümemaexŭ.

13

¹ Rû woo togû i nagawa chideaxgu, rû woo Tupanaârû orearû ngeruûgû i daxûcûăxgawa chideaxgu, natûrû ñoma wûxi i tacû i âgaxûrûûmare chixî ega tama guxâxû changechaûgu. ² Rû woo nûxû chachuèxgu na meă duûxûgûmaă nûxû chixuxû i Tupanaârû ore, rû woo nûxû chachuèxgu i guxûma i tacû i êxûguxû i Tupanachiga, rû woo choxû natauxchagu na chorû ômaă chayaxîgachixêêxû ya mèxpûnegû, natûrû taxuwama chame ega tama guxâxû changechaûgu. ³ Rû woo ngêma duûxûgû i ngearû dîeruăxgûxûxû chayanuxgu i guxûma i tacû i choxû ngêxmaxû, rû woo Tupanaârû oreçèx chaugû ichaxăxgu na ûxûwa choxû yagugûxûcèx, rû taxuwama choxû name i ngêma ega tama guxâxû changechaûgu. ⁴ Rû yîxema guxâxû ngechaûxê, rû yaxna namaă taxînü, rû namaă tamecûma. Rû tama tixăûxăchiwêxe, rû tama togûxû tûgû tarûyexera rû tama tûgû ticuèxû. ⁵ Rû yîxema aixcûma guxâxû ngechaûxê, rû tama taguxchigawêxe, rû tama tûgûguxicatama tarûxînü, rû tama tanuxwêxe, rû tama nagu tarûxînüêcha ega texé chixexû tûmamaă ûxgu. ⁶ Rû tama namaă tataă i chixexûgû, natûrû namaă tataă i ngêma ore i aixcûma ixîxû. ⁷ Rû yîxema aixcûma guxâxû ngechaûxê, rû yaxna namaă taxînü, rû guxûguma nûxû tayaxô, rû guxûguma mexûgu namaă tarûxînü, rû taguma naxchi taxai woo tacû tûmamaă naxûxgu i togû. ⁸ Rû ngêma yigû na ingechaûxû rû tagutăma inayacuèx. Natûrû ngêma na nûxû ixuxû i Tupanaârû ore rû wûxi i ngunexûgu tá inayacuèx. Rû ngêma

tama nūxū icuáxū i nagawa na idexaxū, rü tá ta inayacuèx. Rü ngēma ñuxma nūxū icuáxū rü wūxi i ngunexūgu rü marü taxuwatáma tūxū name. ⁹ Erü ngēma tórü cuèx i ñuxma tūxū ngēxmaxū, rü Tupanapēxewa rü naxíra. Rü ngēxgumarūū ta i ngēma norü orexū na ixuxū, rü wūxi i íramarexūtama nixī. ¹⁰ Rü guxūma i ngēma rü tá inayarūxo i ngēxguma Tupanapēxewa ingugūgu rü nūma tá guxūxūma tūxū nacuéxēēgu. ¹¹ Yexguma chabuxgu ga chomax, rü wūxi ga buxūrūū chidexa, rü buxū nagu rüxīnūxūgu charūxīnū, rü tama meā chauāēxū chacuèx. Natürü yexguma marü chayèxgu, rü nūxū charūxo ga guxūma ga yema chorü bucūma. ¹² Rü ngēma ñuxma nūxū idauxū i Tupanachiga, rü ñoma wūxi i worua ya üxachametūxewa yigū idauxūrūū nixī na taxcèx naxēxū. Natürü yixcūra rü tá aixcūma meā nūxūxūchi tadau ya Tupana. Rü ñuxma rü írarūwatama nūxū chacuèx i Tupanachiga. Natürü wūxi i ngunexūgu rü tá meā nūxū chacuèx i guxūma i nachiga, ngēma na Tupana meāma choxū cuáxūrūū. ¹³ Rü ñuxma rü nangēxma i tomaēxpūx i nacūmagü i guxūgutáma ngexmaxū. Rü ñaāgü nixī:

1 Rü Tupanaāxū tayaxōgü

2 Rü nūxū ítananguxēē na nataeguxū ya Cristu

3 Rü nūxū tacuèx na tamücūxū ingechaūxū.

Natürü ngēma tomaēxpūxtanūwa rü ngēma rümemaexū nixī na guxāxū ingechaūxū.

*Ngēma tama nūxŭ icuáxŭ i nagawa na idex-
axŭchiga*

¹ ¡Rŭ naxcèx pedèux na guxãxŭ pengechaŭxŭ! Rŭ ngēxgumarŭŭ ta name nixĩ i naxcèx pedau i ngema tauxchagŭ rŭ ngema cuèx i Naãe i Üünexŭwa ne ĩxŭ. Rŭ ngēma cuèx i yexeraãcŭ penaxwaexŭ nixĩ na pexŭ natauxchaxŭ na nūxŭ pixuxŭ i Tupanaarŭ ore. ² Yíxema duŭxē ya tama nūxŭ tacuáxŭ i nagawa idexaxe, rŭ Tupanamaã nixĩ i tidexaxŭ rŭ tama i duŭxŭgŭmaã, erŭ taxúema nūxŭ tacuèx na ñuxŭ ñaxŭchiga yĩxŭ. Rŭ Tupanaãe i Üünexŭ nixĩ i tüxŭ idexaxēexŭ, natürŭ ngēma ore i nūxŭ tixuxŭ rŭ ěxŭguxŭ nixĩ. ³ Naturŭ yíxema nūxŭ ixuxe i Tupanaarŭ ore rŭ ngema yaxôgŭxŭarŭ ngŭxēeruxŭ tixĩ, erŭ yexeraãcŭ cuèxwa tanangugŭxē rŭ nūxŭ tanangúchaxŭxē i ngema ore rŭ tanataãexē i ngema yaxôgŭxŭ i ngexguma guxchaxŭ nūxŭ ũpetŭgu. ⁴ Rŭ yíxema duŭxē ya tama nūxŭ tacuáxŭ i nagawa idexaxe, rŭ tümacèxtama nixĩ i ngema na yexeraãcŭ mea Tupanaãxŭ tayaxôxŭcèx. Natürŭ yíxema nūxŭ ixuxe i Tupanaarŭ ore rŭ nūxŭ tixu na yexeraãcŭ Tupanaãxŭ yaxôgŭãxŭcèx i guxŭma i yaxôgŭxŭ. ⁵ Choma chierŭ chanaxwèxe na guxãma i pema rŭ ngēma tama nūxŭ pecuáxŭ i nagawa na pidexagŭxŭ. Natürŭ yexeraãcŭ chanaxwèxe na duŭxŭgŭmaã nūxŭ pixuxŭ i Tupanaarŭ ore. Erŭ ngēma to i nagawa na pidexagŭxŭarŭ yexera narŭmemaẽ na togŭmaã nūxŭ pixuxŭ i Tupanaarŭ ore. Natürŭ ngēma to i nagawa na idexaxŭ, rŭ name ega ngēma yaxôgŭxŭmaã nūxŭ ixuxgu na tacŭchiga yĩxŭ i ngēma dexe, na nŭmagŭ rŭ

ta yexeraäcü meã Tupanaãxũ yaxõgũãxüçèx. ⁶ Rü ngẽmacèx, Pa Chaueneẽgũx, rü ngẽxguma chi pexũtawa chaxũxgu, rü chi to i nagawa chideaxgu, ¿rü tacüwa chi pexũ namexũ i ngẽma? Natürü ngẽxguma chi pemaã nüxũ chixuxgu i ngẽma Tupana tüxũ nüxũ cuèxẽẽxũ, rü êxna ngẽma chomatama nüxũ chacuáxũ na aixcüma yĩxũ, rü êxna ngẽma êxũguxũ i ñuxma Tupana tüxũ nüxũ cuèxẽẽxũ, rü êxna tacü rü to i nguxẽẽtae i Tupanachiga, rü ngẽma waxi nixĩ i pexũ mexũ. ⁷ Rü dücax ngẽma paxetaruũ i quena rü êxna arpa! Rü ngẽxguma tãu chima texé meã napaũxgu, rü tãu chima nüxũ tacuèx na tacügu tanapaxũxũ. ⁸ Rü ngẽma churaragü, rü ngẽxguma norü uwanügümaã nügü nadaixchaũgu, ¿rü ñuxäcü tá nügü namexẽẽ na nügü nadèixüçèx ega tama meã nangógagu ya yima corneta ya dèixcèx naxcèx çaxũne? ⁹ Rü ngẽxgumarüũ ta pexũ nangupetü. Rü ngẽxguma chi perü conümaã nüxũ pixuxgu i dexe i taxüema nüxũ cuáxũ, ¿rü ñuxäcü tá nüxũ tacuèx na ñuxũ ñaxũchiga yĩxũ i ngẽma nüxũ pixuxũ? Rü ñoma ngürüanewa pidexagüxürüũ tá pixĩgü. ¹⁰ Rü aixcüma nixĩ i namuxũ i nagagü i ñoma i naãnewa. Rü guxũma i ngẽma nagagü rü name naxcèx i ngẽma duũxũgü i nawa idexagüxũ. ¹¹ Natürü ngẽxguma chi tama nüxũ chacuèxgu i ngẽma naga i to i duũxũ chomaã nawa idexaxũ, rü ngẽma duũxüçèx rü ñoma to i nachiũãnecũãxrüũ chixĩ, rü chauxcèx rü ñoma to i nachiũãnecũãx i duũxürüũ nixĩ i nümax. ¹² Choma nüxũ chacuèx rü pema rü pexũ nangúchaũ na pexũ nangẽxmaxũ i ngẽma nacümagü i Tupanaãe i Üünexũ tüxna äxũ. Natürü

name nixĩ i naxcèx pedau na guxũãrũ yexera pexna naxããxũ i ngẽma nacũmagũ i namaã nüxũ perũngũẽẽxũ i guxũma i yaxõgũxũ na yexeraãcü meã Tupanaãxũ yaxõgũãxũcèx. ¹³ Rũ ngẽmacèx yíxema duũxẽ ya taxúema nüxũ cuáxũ i nagawa idexaxe, rũ name nixĩ i Tupanana naxcèx taca na tũxna naxããxũcèx i cuèx na togũmaã nüxũ tixuxũcèx na ñuxũ ñaxũchiga yĩxũ i ngẽma nüxũ tixuxũ. ¹⁴ Rũ ngẽxguma chi taxúema nüxũ cuáxũ i nagawa chayumũxẽgu, rũ chauãẽ nixĩ i ngẽma yumũxexũ. Natürũ chomatama rũ taxuũma chacuèx na tacũchiga yĩxũ i ngẽma. ¹⁵ ¿Rũ ñuxãcü tá chayumũxẽxũ i ñuxmax? Rũ marũ name nixĩ ega taxúema nüxũ cuáxũ i nagawa chayumũxẽgu, natürũ chanaxwèxe i guxãma nüxũ cuáxũ i nagawa rũ ta chayumũxẽ. Rũ marũ name nixĩ ega taxúema nüxũ cuáxũ i nagawa chawiyaegu, natürũ chanaxwèxe i guxãma nüxũ cuáxũ i nagawa rũ ta chawiyae. ¹⁶ Erũ ngẽxguma chi taxúema nüxũ cuáxũ i nagawa Tupanaxũ quicuèxũũgu, rũ yíxema duũxẽgũ ya ngẽma irũxĩnũẽxẽ, rũ taxucürũwa cumaã wũxigu Tupanaxũ ticuèxũũgũ, erũ tama nüxũ tacuèx na ñuxũ ñaxũchiga yĩxũ i ngẽma nüxũ quixuxũ. ¹⁷ Rũ woo ngẽma curũ yumũxẽ rũ namexẽchixgu, natürũ yíxema duũxẽgũ ya ngẽma irũxĩnũẽxẽ rũ taxuũma i mexũ nawa tayaxu ega to i nagawa quideaxgu. ¹⁸ Tupanana moxẽ chaxã, erũ perũ yexera taxúema nüxũ cuáxũ i nagawa chidexa. ¹⁹ Natürũ woo muxũma i ore i taxúema nüxũ cuáxũ i nagawa na chidexaxũ, natürũ ngẽma yaxõgũxũãrũ ngutaquẽxegũwa rũ chauxcèx rũ narũmemaẽ chi nixĩ ega woo noxre i ore i

meãma nüxü icuáxüwa namaã nüxü chixuxgu i Tupanaãrü ore na ngẽmaãcü ngẽmamaã meã chanangüexẽxüçèx. ²⁰ Pa Chaueneẽgüx, tama name i ñoma buxügürüü chixri nagu perüxĩnüe i ngema ore i pemaã nüxü chixuxü. Rü narümemae nixĩ i ñoma buxügürüxü pegü pixĩgüxẽ naxchèxwa i ngema chixexü, natürü ngema peru ñnüwa rü penaxwèxe i duüxügü i marü yaxürüü mea nagu perüxĩnüe rü nagu pexĩ i ngema ore i pemaã nüxü chixuxü. ²¹ Tupanaãrü ore ga nuxcümaüxü ga norü orearü uruü ümatüxü rü ñanagürü:

“Rü nuã tá chanamugü i to i nachiüñecüäx i duüxügü na to i nagawa yadexagüxüçèx namaã i ñaã Yudíugü i tama yaxögüxü. Natürü woo ngẽmaãcü chanaxüxgu, rü täütáma chauga naxĩnüe i ngẽma Yudíugü i tama irüxĩnüëchaüxü”,

ñanagürü ga Tupana. ²² Rü ngẽmacèx ngẽma na taxúema nüxü cuáxü i nagawa idexaxü, rü wüxi i cuèxruü nixĩ naxcèx i ngẽma duüxügü i tama irüxĩnüëchaüxü. Rü tama duüxügü i marü yaxögüxüçèx nixĩ i ngẽma. Natürü ngẽma Tupanaãrü orexü na ixuxü, rü duüxügü i marü yaxögüxüçèx nixĩ na yexeraãcü meã Tupanaãxü yaxögüãxüçèx. Rü tama duüxügü i tama irüxĩnüëchaüxüçèx nixĩ i ngẽma. ²³ Rü ngẽxguma chi pema i yaxögüxe pengutaquẽxegügu, rü guxã chima to i nagawa pidexagügu, ¿rü ñuxü ñaxü tá ega petanügu naxücuxgu i wüxi i duüxü i ngema iyarüxĩnüxü rü ëxna wüxi i duüxü i tauta yaxõxü? ¿Taux ëxna i nagu tá naxĩnüxü na pexãüãẽgüxü i pemax? ²⁴ Natürü ngẽxguma chi guxãma i pema nüxü pixuxgu i Tupanaãrü ore,

rū chi petanūgu naxūcuxgu i wūxi i duūxū i tama yaxōxū rū ēxna wūxi i duūxū i ngēma iyarūxīnūxū, rū tá nūxū naxīnū i ngēma Tupanaārū ore i nūxū pixuxū. Rū ngēmaācū tá nūxū nacuēx na nūma rū wūxi i pecaduāxū na yīxū. Rū nūgūgu tátama ínarūxīnū i ngēxguma nūxū naxīnūgu i ngēma nūxū pixugūexū. ²⁵ Rū ngēma chixexū i nūxīcatama nūxū nacuáxū rū tá naxcēx ínicuēx. Rū nūma rū ngēxma tá nacaxāpūxū, rū tá Tupanaxū nicuēxū. Rū tá nūxū nixu na aixcūma Tupana petanūwa nangēxmaxū.

Tama name i penaxīxāchiāxēgū i perū ngutaquewa, rū name i meamare penaxū

²⁶ Dūcēx, Pa Chaueneēgūx, űuxma tá pemaā nūxū chixu na űuxācū tá penaxūxū ega ngēxguma pengutaquēxegūgu. Rū űuxre i pema rū marū name na Tupanaārū wiyaegu pewiyaegūxū, rū togue rū tanguxēētaegūxū, rū togue rū nūxū tixuxū i ngēma ore i Tupana tūxū nūxū cuēxēēxū, rū togue rū nawa tidexagūxū i naga i tama nūxū tacuēxgūxū, rū togue rū tanangoxēēgūxū i ngēma dexa i to i nagawa nūxū yaxugūxū. Natūrū guxūma i ngēma rū tanaxwēxe i yaxōgūxūārū ngūxēēcēx na yīxū, na yexeraācū yaxōgūāxūcēx rū meā Tupanacēx namaxēxūcēx. ²⁷ Rū ngēxguma to i naga i pema tama nūxū pecuáxūwa pidexagūgu, rū name nixī i taxre rū ēxna tomaēxpūxicatama tidexagū. Rū tanaxwēxe i wūxiexira tidexa i noxri rū yixcama ya togue. Rū ngēxguma chi texé to i nagawa ideaxgu, rū name nixī na tangēxmaxū ya wūxie ya nūxū ixuchigūxe na tacūchiga yīxū i ngēma ore i to i

nagawa nüxŭ yaxuxŭ. ²⁸ Natürü ngëxguma chi tatauxgu na texé nüxŭ ixuchigüxŭ na tacüchiga yïxŭ i ngëma ore i to i nagawa nüxŭ yaxuxŭ, rü narümemaē nixī na noxtacüma tama to i nagawa pidexagü i perü ngutaquëxewa. Rü narümemaē i wüxichigü tüxica Tupanamaāxīcatama bexma tidexa. ²⁹ Rü ngëxgumarüŭ ta ngëxguma pengutaquëxegügu, rü name nixī i taxre rü êxna tomaēxpüxicatama nüxŭ tixu i Tupanaärü ore. Rü ngëma togü i ngutaquëxetanüxŭ rü name nixī na meā nangugügüāxŭ i ngëma ore. ³⁰ Natürü ngëxguma chi iyadexayane i wüxi i duŭxŭ, rü Tupana tümamaā ideaxgu ya togue ya ngema rütoxe, rü name nixī na iyanachianexŭ i ngëma nüxīra idexaxŭ na tidexaxüçèx ya yíxema duŭxē ya Tupana tümamaā idexaxe. ³¹ Rü ngëmaācü guxāma i pema na Tupana pemaā idexaxŭ, rü name nixī i wüxichigü ípenanguxēē na pewa nanguxŭ na pidexagüxŭ i Tupanaärü ore. Rü ngëmaācü i ngëma togü i ngutaquëxetanüxŭgü rü tá Tupanachiga meā nangúe rü tá nataāēgü. ³² Rü ngëmaācü tanaxwèxe i meāma tümāāēmaā itacuèx ya wüxichigü ya yíxema Tupanaärü orexŭ ixuxe. ³³⁻³⁴ Erü perü ngutaquëxegüwa rü Tupana nanaxwèxe na meā penaxüxŭ i guxŭma, rü tama nanaxwèxe na ngema pexāūgatanüxŭ rü pegü ípetüexēēxŭ. Rü guxŭma i togü i yaxōgüxŭārü ngutaquëxegüwa rü marü nüxŭ nayapue na tama yadexagüxŭ i ngexŭgü. Rü name nixī i pema rü ta ngëmaācü penaxü, erü nachuxu na yadexagüxŭ i ngexŭgü i ngutaquëxegüwa. Rü name nixī na yatügüga naxīnūexŭ i ngexŭgü, ngëma Tupanaärü ore tüxŭ muxŭrŭ. ³⁵ Rü ngëxguma chi tacüxŭ

nacuáxchaŭgu i wüxi i ngexŭ, rü name nixĩ i nachiŭwatama natena naca i nachiga i ngẽma. Erü wüxi i ãne nixĩ ega ngutaquẽxewa yadeaxgu i wüxi i ngexŭ. ³⁶ Pa Corĩtiucŭāxgŭx, name nixĩ na nüxna pecuẽxāchiexŭ na tama pewaxira ne naxŭxŭ i Tupanaārü ore. Rü tama pexicatama nixĩ i penayauxgŭxŭ i ngẽma. ³⁷ Rü ngẽxguma chi texé tŭgŭgu rŭxĩnŭgu na Tupanaārü orearü uruŭ tiŭxŭ rŭ ěxna tŭgŭgu tarŭxĩnŭgu na Tupanaāē i Üünexŭ tŭxna naxāxŭ i tacü rŭ cuèx, rü name nixĩ i nüxna tacuẽxāchi na tórü Coriarü ore yŭxŭ i ñaã ore i pexcèx chaxŭmatŭxŭ. ³⁸ Natürü ngẽxguma chi texé tama nüxŭ cuáxchaŭgu i ngẽma pemaã nüxŭ chixuxŭ, rü name nixĩ i tama tŭxŭ pecuáxchaŭ. ³⁹ ¡Rü ngẽmacèx, Pa Chaueneẽgŭx, rü Tupanana naxcèx peca i cuèx na meãma nüxŭ pixuxŭcèx i norü ore! ¡Rü tama penachuxu na to i nagawa yadexagŭxŭ i duŭxŭgŭ! ⁴⁰ Rü perü ngutaquẽxegŭwa, rü name nixĩ na meã penaxŭxŭ i guxŭma. Rü tama name i ngema pexāŭgatanŭ rŭ pegü ípetüexēē.

15

Cristu na yuwa írüdaxŭchiga

¹ Rü ñŭxmax, Pa Chaueneẽgŭx, rü chanaxwèxe i nüxna pecuẽxāchie i ngẽma Tupanaārü ore i tŭxŭ maxẽxēēxŭ ga pemaã nüxŭ chixuxŭ. Rü yematama ore nixĩ ga pema peyauxgŭxŭ. Rü ñŭxma rŭ ngẽmatama oregagu nixĩ i meã peyaxõgŭxŭ. ² Rü ngẽma oregagu nixĩ i pexŭ nangẽxmaxŭ i maxŭ i taguma gŭxŭ, ega aixcŭma guxŭguma peyaxõgŭamagu. Natürü ngẽxguma

tama guxūguma peyaxōgūgu, rü natüçèxmamare nixĩ i ngēma perü ô. ³ Rü yexguma noxri petanüwa changuxgu, rü yema nüxira pexũ changuxēēxũ nixĩ ga yema chaxira togũ choxũ ngxēēxũ na Cristu rü tórü pecaducèx nayuxũ, ngēma Tupanaärü ore i ümatüxüwa nüxũ yaxuxürüũ. ⁴ Rü yexgumarüũ ta pexũ changúexēē na ñuxácü inatēxgüāxũ, rü ñuxácü norü tomaēxpüx ga ngunexūgu rü wena na namaxüxũ, ngēma Tupanaärü ore i ümatüxüwa nüxũ yaxuxürüũ. ⁵ Rü yexgumarüũ ta pexũ changúexēē ga ñuxácü Pedrucèx na nangóxũ ga Cristu, rü ñuxácü yixcūra rü norü ngúexūgũ ga yamugüxüçèx na nangóxũ. ⁶ Rü yemawena ga Cristu rü noxtacüma 500 arü yexera ga yaxōgüxüçèx nangox. Rü muxüma i ngēma duüxūgũ rü ñuxma rü ta namaxē, natürü nümaxũ rü marü nayue. ⁷ Rü yemawena rü Chaütiágucèx nangox, rü yixcama guxüma ga yema togũ ga ngúexūgüçèx nangox. ⁸ Rü düxwa chowa inayacuèx ga chauxcèx rü ta na nangóxũ, woo ngürüāchimare nixĩ ga yema, ngēxgumarüũ i wüxi i buxũ i tautama norü ngunexüwa nanguyane buxürüũ. ⁹ Rü choma rü guxüma i ngēma togũ i Tupana imugüxütüüwa chaxü. Rü ngemacèx tama name i Tupana imuxümaā choxũ naxugüxũ i duüxūgũ, yerü nawe chingēchigũ ga Tupanaärü duüxūgũ rü poraácü chixexũ chaxü. ¹⁰ Natürü ga Tupana rü chomaā namecüma, rü ngēmacèx i ñuxma rü choxũ pedau na tacü chiixũ rü ñuxácü na chiixũ. Rü yema chomaā na namecümaxũ rü tama natüçèxma nixĩ. Yerü choma rü guxũ ga togũ ga yamugüxüärü yexera chanaxü ga Tupanaärü puracü. Natürü tama chauechama

chanaxü ga yema puracü, natürü Tupana ga chomaã mecümacü rü chomaã puracücü nixĩ ga naxücü ga yema puracü na nüxü chixuxüçèx ga norü ore. ¹¹ Natürü i ñuxma rü nüetama nixĩ ega woo choma chixĩgu rü ěxna togü yixĩgu ga pemaã nüxü ixuxü ga yema ore. Yerü yema ore ga pemaã nüxü tixuxü, rü Tupanaãrü ore i tüxü maxëẽxü nixĩ, rü yema nixĩ ga pixögüxü.

Ñuxãcü wena tá namaxë i duïxügü i yuexü

¹² Marü pemaã nüxü tixu na Cristu rü yuwa ínadxü. ¿Rü tüxcüü ñuxre i pema rü ñaperügügü:

“Yuexü rü tagutáma wena namaxë”, ñaperügügü? ¹³ Rü ngëxguma chi ngëma yuexü rü tagu chima wena namaxëgu rü yima Cristu rü tãu chima wena namaxü. ¹⁴ Rü yexguma chi Cristu tama wena maïxgu, rü ngëma ore i nüxü tixuxü i nachiga rü taxuwa chima name, rü natüçèxmamare chi nixĩ i perü õ. ¹⁵ Rü ngëxguma chi ngëmaãcü yixĩgu, rü toma i Tupanaãrü orearü uruügü rü doratëëxgüxü tixĩgü. Erü nüxü tixu na Tupana Cristuxü wena maxëẽxü. Rü ngëxguma chi tama aixcüma yixĩgu na wena namaxëxü i yuexü, rü chi wüxi i doramare nixĩ na Tupana Cristuxü wena maxëẽxü. ¹⁶ Rü ngëxguma chi ngëma yuexü rü tagu chima wena namaxëgu, rü ga Cristu rü chi ta tãu chima wena namaxü. ¹⁷ Rü yexguma chi Cristu tama wena maïxgu, rü natüçèxmamare chi nixĩ i peyaxögüxü, rü ñuxma rü chi ta perü pecadugagu ipeyarütauxe. ¹⁸ Rü chi ngëmaãcü yixĩgu rü ngëma duïxügü i Cristuaxü yaxögüxü i marü yuexü, rü chi ta tãu chima nüxü nangëxma i maxü i taguma gúxü. ¹⁹ Rü ngëxguma

chi ñoma i maxūcèxicatama yixīgu na Cristuaxū yaxōgūxū, rü chi guxū i togū i duūxūgūarū yexera tangechaūtümūgū. ²⁰ Natürü aixcūmaxūchi nixī ga Cristu ga yuwa na ínadxū. Natanüwa i guxūma i ngēma yuexū i yixcūra tá írüdagūxū, rü Cristu nixī ga namaã inaxūgücū na ínadxū, yerü nüma nixī ga nüxīra wena namaxūxū. ²¹ Rü yexgumarūū wūxi ga yatūgagu na nayuexū ga duūxūgū, rü ngēxgumarūū tá ta nixī na wūxi i yatūgagu wena namaxēxū i ngēma marü yuexū. ²² Rü ngema na Adáūgagu guxāma na yuexū, rü ngēxgumarūū ta Cristugagu tá namaxēxū i guxūma i duūxūgū i nüxū yaxōgūxū. ²³ Natürü wūxichigū tá tümawa nangu na wena tamaxūxū. Rü Cristu nixī ga nüxīra maxūcū. Rü ngēxguma wena núma naxūxgu i nümax, rü ngēxguma tá nixī i wena namaxēxū i ngēma duūxūgū i noxrū ixīgūxū. ²⁴ Rü ngēmawena tá nixī i nagúxū i naāne. Rü ngēxguma tá nixī ya Cristu i nüxū naporamaēxū i guxūma i norü uwanūgū. Rü ngēxguma tá nixī i Nanatū ya Tupanana naxāāxū i guxūma na nüma namaã inacuáxūcèx. ²⁵ Erü nüma ya Cristu rü āēxgacū tá nixī ñuxmatáta nüxū naporamaē i guxūma i norü uwanūgū. ²⁶ Rü ngēma nawa iyacuáxū i norü uwanü i tá nüxū naporamaēxū, rü yu nixī. ²⁷ Yerü Tupana rü marü Cristumēxēwa nanayexmagūxēē ga guxūma. Natürü woo Tupanaārū ore nüxū ixuxgu na Cristumēxēwa nangēxmagūxū i guxūma, natürü nümatama ya Tupana rü tama Cristumēxēwa nangēxma. Yerü nüma ga Tupana nixī ga Cristumēxēwa nayexmagūxēēāxū ga guxūma. ²⁸ Rü ngēxguma

guxūma Cristumēxēwa ngēxmagūgu, rü ñuxūchi nūmatama ya Cristu ya Tupana Nane rü tá Nanatūmēxēwa nūgū nangēxmaxēē. Yerū nūma ga Tupana nixī ga Cristumēxēwa nayexmagūxēēāxū ga guxūma. Rü ngēmaācū ya Tupana rü guxūmaā tá inacuēx. ²⁹ Rü nangēxma i ñuxre i duūxūgū i petanūwa i Tupanaegagu yuexūchicūū íbaiūxū. ¿Rü tūxcūū ngēma naxūgū? Rü ngēxguma chi tama wena namaxēgu i duūxūgū i yuexū, ¿rü tūxcūū ngēma yuexūchicūū ínabaiū? ³⁰ ¿Rü tūxcūū i toma rü guxūguma āūcūmaxūwa tangēxmagū? ³¹ Pemaā nūxū chixu, Pa Chaueneēgūx, rü guxū i ngunexūgu rü āūcūmaxūwa changēxma, rü tama nūxū chacuēx i tacū rü ngunexūgu Tupanaārū oregagu tá na chayuxū. Rü ngēma rü aixcūmaxūchi nixī, ngēxgumarūū na aixcūma yīxū na choxū nangēxmaxū i wūxi i taāē i taxū i ñuxma na tórū Cori ya Ngechuchu ya Cristuaxū peyaxōgūxū. ³² Choma rü nuā Epéchiuwa rü Tupanaārū orechigagu chorū uwanūmaā poraācū togū tachoxūgagū. Rü ñoma naēxū i idūraexūmaā togū tadēixūrūū tixīgū. ¿Natürū tacūwa choxū namexū ga yema ega chorū maxū i ñoma i naānewa choxū ngēxmaxūcēxicatama yixīgu? Rü ngēxguma chi aixcūma yixīgu na tama wena namaxēxū i yuexū, rü marū name i ñatarūgūgū:

“¡Ngīxā tachibūe rü taxaxegū, erū paxa tá tayue!” ñatarūgūgū. ³³ ¡Natürū tāūtáma nawe perūxī i ngēma duūxūgū i ngēmaācū chixri idex-agūxū! Erū aixcūma nixī i ngēma ore i ñaxū:

“Rü texé ya chixexū i duūxūmaā āmūcūxe, rü tūxū inayanaxoxēē i tūmacūmagū i mexū”, ñaxū.

³⁴ Rū name nixī i meã pegüãëgu perüxĩnũë rü nüxũ perüxoe i ngẽma perü chixexũgũ. Rū wüxi i perü ãne nixī na pemaã nüxũ chixuxũ rü ñuxre i pema rü tama aixcũma Cristuarũ duũxũgũ pixĩgũxũ rü tama aixcũma Tupanaxũ pecuëxgũxũ.

Ñuxãcũ wena namaxẽ i yuexũgũ

³⁵ Natürũ ngürũãchi tá texe pexna taca rü ñatarũgũ pexũ:

“¿Ñuxãcũ tá wena namaxẽxũ i yuexũ? ¿Rü nañuxraũxũ i naxũnemaã tá ínadagũxũ?” ñatarũgũ tá pexũ. ³⁶ Pa Duũxũ i Ngẽãẽmarexũx jrü dücax! Rū ngẽxguma wüxi ya nanetũchire itoxgu, rü nũma ya yima naxchire rü nayu na ngemaãcũ naxũxũcèx i ngẽma nanetũ. ³⁷ Rū ngẽma waixũmũgu itoxũ, rü tama marũ nanetũ ixĩxũ nixī, natürũ naxchire nixī ya yima itoxũne woo triguchire rü êxna ngexũrüxũmare i to i nanetũchire yixĩgu. ³⁸ Rū ngẽxguma marũ inatoxguwena, rü Tupana nixī i yanaxũxẽẽcũ ya yima nachire na nũma nanaxwẽxexũãcũma yĩxũcèx i ngẽma nanetũ.

³⁹ Rū tama guxũ i naxũnegũ nawũxigu. Rū duũxẽxũne rü nanatoraxũ, rü naẽxũgũxũne rü to nixī, rü werigũxũne rü to nixī, rü choxnigũxũne rü to nixī. ⁴⁰ Rū ngẽxgumarũũ ta nangẽxma i naxũnegũ i daxũguxũ i naãnecũãx, rü nangẽxma i naxũnegũ i ñoma i naãnecũãx. Rū ngẽma daxũguxũ i naãnecũãx i naxũnegũ rü nüxũ nangẽxma i noxrütama mexũ, rü ngẽma ñoma i naãnecũãx i naxũnegũ rü ta nüxũ nangẽxma i noxrütama mexũ. Natürũ tama nawũxigu i ngẽma norũ mewa. ⁴¹ Rū üèxcüarũ yauracũ rü tama namaã nawũxigu i tauemacüarũ yauracũ.

Rū woramacurigārū yauracūū rū to nixī. Rū nūgūtānūwa ya woramacurigū, rū tama nawūxigu i norū yauracūūwa. ⁴² Rū ngēxgumarūū tá ta naxūpetū namaā i naxūnegū i ngēma duūxūgū i yuexū. Erū ngēma naxūne i noxri nūxū ngēxmaxū rū iyarūxoxwēxexū nixī. Natürū ngēma naxūne i tá nūxū ngēxmaxū i ngēxguma wena namaxēgu, rū ngēma rū tagutāma inayarūxo. ⁴³ Rū ngēma naxūne i yuxū rū taxuwama name i ngēxguma inatēxgux. Natürū ngēxguma wena namaūxgu rū tá namexēchi. Rū ngēma naxūne i ñuxma turaxū rū ngēxguma wena namaūxgu rū tá napora. ⁴⁴ Rū itanatēx i ngēma naxūne i ñoma i naānecūāx ixīxū. Natürū ngēxguma inadxgu, rū daxūcūāx i naxūne tá nixī. Rū ñuxma na nangēxmaxū i naxūne i ñoma i naānecūāx rū ngēmawa nūxū tacuēx na nangēxmaxū ta i naxūne i daxūcūāx. ⁴⁵ Tupanaārū ore i ūmatūxūwa rū ñanagürū:

“Guma nūxīraūcū ga yatū ga Adáū rū nūxū
nayexma ga ñoma ga naānecūāx ga naxūne
ga paxaāchi maxūxū”,

ñanagürū. Natürū ya Cristu rū daxūcūāx nixī. Rū nūma nixī i tūxna naxāāxū i maxū i taguma gūxū. ⁴⁶ Noxri rū tūxū nangēxma i ñoma i naānecūāx i taxūne. Natürū yixcama rū Tupana tá tūxna nanaxā i to i taxūne i daxūcūāx ixīxū. ⁴⁷ Guma nūxīraūcū ga yatū ga waixūmūwa ūcū, rū ñoma ga naānecūāx nixī. Natürū tórū Cori ya Cristu rū daxūguxū i naānecūāx nixī. ⁴⁸ Rū ngēma taxūnegū i ñoma i naānewa tūxū ngēxmaxū, rū guma Adáūxūne ga waixūmūwa ūcūrū nixīgū. Natürū ngēma naxūnegū i daxūwa nūxū ngēxmaxū i duūxūgū, rū Cristuxūnerū

nixĩgũ. ⁴⁹ Rũ ñgexgumarũũ na Adáũ ga waixũmũwa ũcũrũũ na yĩxũ i taxũne, rũ ngẽxgumarũũ tá ta Cristu ya daxũwa ngẽxmacũrũũ nixĩ i taxũne i yixcũra. ⁵⁰ Rũ dũcax, Pa Chaueneẽgũx, pemaã nũxũ chixu rũ ñaã taxũne i namachinaxcẽx rũ naxchinẽxãnaxcẽx, rũ taxucũrũwa Tupana ãẽxgacũ íyĩxũwa nangu. Erũ ngẽma iyarũxoxũ, rũ taxucũrũwama Tupanaxũtawa i ngextá taxuũma iyarũxoxũwa nixũcu. ⁵¹ Natũrũ chanaxwẽxe na nũxũ pecuáxũ i wũxi i ore i ẽxũguxũ ga noxri Tupanaxĩcatama nũxũ cuáxũ. Rũ dũcax, tãũtãma guxã tayue, natũrũ guxãxũne rũ tá naxũchicũũ. ⁵² Rũ ngũrũãchimare wũxi i peãxẽtũgu tá nixĩ i ngẽma na naxũchicũũxũ i taxũne i ngẽxguma naãneãrũ guxgux naxãgagu ya corneta. Rũ tá naxãga ya yima corneta, rũ ngẽxguma i ngẽma duũxũgũ i yuexũ rũ tá ínarũdagũ na tagutãma wena nayuexũcẽx. Rũ yixema na imaxẽxũ rũ tá naxũchicũũ i taxũnegũ. ⁵³ Erũ ngẽma taxũne i yuxwẽxexũ rũ woetama tama taixũ rũ tá naxũchicũũ. Rũ wũxi i ngexwacaxũxũ i naxũne i aixcũma taixũ rũ tagutãma yuxũ tá nixĩ. ⁵⁴ Rũ ngẽxguma ngẽmaãcũ naxũchicũũgu i taxũne i yuxwẽxexũ, rũ tũxũ nangẽxmagu i taxũne i ngexwacaxũxũ i taguma yuxũ, rũ ngẽxguma tá nixĩ i yanguxũ i Tupanaãrũ ore i ũmatũxũ i ñaxũ: “Marũ inayarũxo na nayuexũ i duũxũgũ. Rũ Tupana rũ marũ yuxũ narũyexera. ⁵⁵ Rũ dũcax, Pa Yux, ¿ngẽxũ i curũ pora i namaã toxũ curũyexeraxũ? ¿Rũ ngẽxũ i ngẽma cuxne i namaã toxũ cudẽixũ?” ñanagũrũ i ngẽma Tupanaãrũ ore. ⁵⁶ Rũ ngẽma naxne i yu, rũ pecadu nixĩ. Erũ ngẽma pecadu nixĩ

i naporaxēēxŭ i ngēma yu na tŭxŭ nadēixŭcèx. Rŭ ngēma mugŭ ga Moīché ūmatŭxŭ nixī i naporaxēēxŭ i pecadu, erŭ woo namexgu i ngēma mugŭ, natŭrŭ taxucŭrŭwama texé aixcŭma tayanguxēē. ⁵⁷ Natŭrŭ name nixī i Tupanana moxē taxā yerŭ nŭma nanamu ga tŏrŭ Cori ya Ngechuchu ya Cristu na ngēma yuxŭ tŭxŭ naporamaēēxŭcèx. ⁵⁸ Rŭ ngēmacèx, Pa Chaueneēgŭ ya Pexŭ Changechaŭgŭxex, rŭ name nixī i meā peyaxōgŭama rŭ taguma ípenatèx i Tupanaärŭ ore. Rŭ name nixī i guxŭguma meā penaxŭ i tŏrŭ Coriarŭ puracŭ, erŭ pema nŭxŭ pecuèx rŭ ngēma puracŭ i nŭxŭ pexŭxŭ, rŭ tama natŭcèxma nixī.

16

Togŭ i yaxōgŭxŭcèx inanutaque ga dīeru

¹ Rŭ ñuxma tá pemañ nŭxŭ chixu i nachiga i ngēma dīeru i penutaquēxexŭ na namañ nŭxŭ perŭngŭxēēgŭxŭcèx i taeneēgŭ i yaxōgŭxŭ i Yudéaanewa ngēxmagŭxŭ. Rŭ ngēma yaxōgŭxŭ i Gárataanewa ngēxmagŭxŭ rŭ marŭ namañ nŭxŭ chixu na ngīxŭ nanutaquēxegŭxŭ i ngēma dīeru. Rŭ chanaxwèxe i pema rŭ ta ngēxgumarŭ penaxŭ. ² Rŭ ngema dīeru i perŭ puracŭwa ngixŭ peyaxucŭwa rŭ gŭxcŭ i yŭxŭarŭ ngunexŭgu rŭ tá ngixŭ pexā i ngēma dīeru i Tupanaarŭ ixīcŭ. Rŭ ngīmañ tá penguxŭ na tama ngēxguma ngema changuxguama ngīxŭ na pedexŭcèx. ³ Rŭ ngēxguma petanŭwa changuxgu, rŭ tá chanaxŭmatŭ i ñuxre i poperagŭ naxcèx i taeneēgŭ i Yerucharéŭwa ngēxmagŭxŭ. Rŭ ñuxŭchi ngēma

poperamaã tá Yerucharéűwa chanamugű i ngěma duűxűgű i pema nűxű pexunetaxű na ngěma ngĩxű nangegűxűcèx i ngěma dĩeru i taeneěgűcèx ngĩxű penutaquěxecű. ⁴ Rű ngěxguma chi choxű natauxchagu na ngěma Yerucharéűwa chaxűxű, rű nűmagű rű tá wűxigu chomaã ngěma naxĩ.

Pauru nagu narűxĩnű na Corĩtiuwa naxűxű

⁵ Choma rű Machedóniãñewa tá chaxűpetű na íchayadauxűcèx i taeneěgű i ngěma ngěxmagűxű. Rű ngěmawena rű tá petanűwa changu na pexű íchayadauxűcèx. ⁶ Rű ngűrűãchi tá ñuxre i ngunexűgű ngěxma petanűgu charűxãűx, rű bexmana ngűrűãchi ngěma petanűwa tá chanangupetűxě ya mucű. Rű ngěxguma rű tá pexű natauxcha na choxű perűngűxěgűxű na ngěma íchaxűxchaűxűwa chaxűxűcèx. ⁷ Erű tama chanaxwèxe i paxaãchimare pexű chadau. Natűrű petanűgu charűxãűxchaű i ñuxre i ngunexű ega chi norű ngűchaxű yixĩxgu ya tórű Cori. ⁸ Natűrű nuã Epéchuiarű ãñewa tá changěxma ñuxmatáta Pětecóstearű ngunexűwa nangu. ⁹ Erű nuã rű tórű Cori poraãcű choxű nanatauxchaxě na nűxű chapuracűxűcèx rű nűxű yaxögűãxűcèx i muxűma i duűxűgű woo namu i ngěma tama naxwèxegűxű na nuã chapuracűxű. ¹⁰ Rű ngěxguma chi Timutéu petanűwa nguxgu, rű chanaxwèxe i meãma penayaxu na petanűwa nataãxűcèx. Erű nűma rű ta chauxrűű tórű Coriarű puracűwa napuracű. ¹¹ Rű ngěmacèx tama chanaxwèxe i texé petanűwa nűxű taxoe. Natűrű chanaxwèxe i nűxű perűngűxě na taãěãcűma nuã naxűxű na choxű íyadauxűcèx. Erű poraãcű

íchananguxêẽ na nuã nanguxúcèx namaã i ngẽma togü i taeneëgü. ¹² Rû ngẽma taeneë i Aporu rû poraãcü nüxũ chacèèxũ na petanüwa íyadauxúcèx namaã i ngẽma togü i taeneëgü. Natürü tama ngema naxũxchaũ i ñuxmax. Natürü ngëxguma naxãchicagu rû tá ngema naxũ.

Pauru nüxũ narümoxê ga yema yaxôgüxũ

¹³ ¡Rû pexuãëgü na taxuũma i chixexügu peyixúcèx! ¡Rû meãma peyaxôgüama woo tacü pexũ üpetügu! Rû name nixĩ i peporaesima rû taxucèxma pemuũê. ¹⁴ Rû guxũma i ngẽma pexũxũ, rû name nixĩ i pegü pengechaũgüãcüma penaxũ. ¹⁵ Rû dücax, Pa Chaueneëgüx, pema nüxũ pecuèx na Estéfanatanüxügü yĩxũ ga nüxĩra yaxôgüxũ ga Acayaanewa. Rû meãma nüxũ pecuèxgü na ñuxãcü poraãcü taeneëgü i yaxôgüxũxũ na nangüxêëgüxũ. ¹⁶ Rû chanaxwèxe i naga pexĩnüê i ngẽma duũxügü i Estéfanatanüxügürüü ixĩgüxũ. Rû ngëxgumarüü ta chanaxwèxe i naga pexĩnüê i guxũma i ngẽma duũxügü i ñaã Tanatüarü puracüwa puracüexũ rû ngüxêëtaegüxũ. ¹⁷⁻¹⁸ Rû ñuxma na taxucürüwama chauxütawa pengëxmagüxũ, rû wüxi ga chorü taã nixĩ na núma naxĩxũ ga taeneëgü ga Estéfana rû Fortunátu rû Acáicu. Rû yema taeneëgü ga núma ìxũ rû pexũ nixuchigagü rû yemaãcü choxũ nataãxêëgü ga yema pexũ na nataãxêëgüxürüü. Rû tanaxwèxe i naga pexĩnüê rû nüxũ pengechaũ i ngẽma duũxügü i ngëmagürüü ixĩgüxũ. ¹⁹ Rû guxũma i taeneëgü i yaxôgüxũ i Áchiaaneärü ñãnegüwa ngëxmagüxũ, rû moxê pexcèx ngema namugü. Rû Aquiru rû Prisila rû guxũma i ngẽma

yaxōgūxŭ i Aquirupatawa ngutaquēxegūxŭ, rū moxē pexcèx ngēma namugū naēgagu ya tórū Cori. ²⁰ Rū guxŭma i taeneēgū i nūma ngēxmagūxŭ rū moxē pexcèx ngēma namu. Rū chanaxwèxe i wūxichigū i pema rū pegū pengechaŭgūācūma pegū perūmoxēgū. ²¹ Choma i Pauru rū choxmēxmaātama pexcèx chanaxūmatū i ñaā chorū moxē. ²² Rū ngēxguma chi texé tama tórū Cori ya Ngechuchu ya Cristuxŭ ngechaŭgu, rū Tupana tá tūxŭ napoxcu. Rū paxa tá ínangu ya tórū Cori. ²³ Rū chanaxwèxe i tórū Cori ya Ngechuchu ya Cristu poraācū pexŭ narüngŭxēē.. ²⁴ Rū guxāma i pema, rū poraācū pexŭ changechaŭācūma pexŭ charūmoxē naēgagu ya tórū Cori ya Ngechuchu ya Cristu.

Rū nuāma pexna,
Pauru

Tupanaarü Ore i Tórü Cori ya Ngechuchu ya Cristuchiga

New Testament in Ticuna (PE:tca:Ticuna)

copyright © 2008 Wycliffe Bible Translators, Inc.

Language: Ticuna

Translation by: Wycliffe Bible Translators, Inc.

Ticuna

tca

Peru

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Ticuna

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files dated 29 Jan 2022

9d5dc22a-30be-5d26-85a9-76047f4c89e6